

畿輔通志卷二百九十三

雜傳七 宋二

宋

正定府

董樞

曹彬

高懷德

楊廷璋

趙晁 子延溥

閻承翰

石知駟 孫全彬

秦翰

張崇貴

王守規

順德府

王仁鎬

張思鈞

張美

廣平府

解暉

丁德裕

大名府

王明

馬令琮

趙玘

司超

崔彥進

潘美

曹翰

李繼勳

馮繼業

趙延進

尹崇珂

冀州

荆罕儒

范廷召

張廷翰

趙州

馬韶

深州

程羽

李昉

宋

正定府

董樞元氏人後唐清泰中以獻書授校書郎晉天福中爲左拾遺知樞密院表奏周廣順初爲左補闕世宗卽位詔常參官各奏封事樞上平吳策淮南平遷浚儀令恭帝卽位遷殿中侍御史乾德初遷主客員外郎上書請伐蜀蜀平通判劍州會全師雄叛攻劍刺史張仁謙足疾不能戰欲棄城走樞固請出戰敗之因招餘眾降仁謙飲樞令醉密殺降數百誣奏樞與賊通會中使自成都還備言其事太祖並召之廷辯曲直仁謙屈下御史臺鞫之黜宋州教練使以樞嘗貢西伐計遷比部郎中三年出兼桂陽監使上書請伐廣南詔益桂陽戍卒三千令樞統之開寶二年又上方略會劉鋹命內侍曾居實侵桂陽樞擊退之三年大舉伐鋹令樞率兵趨連口

克之改兵部郎中權知連州兼行營招撫使嶺南平賜錢三百萬四年移知襄州又爲河北轉運使改判西京留司御史臺初樞罷桂陽監以左贊善大夫孔璘代璘通三禮嘗講學於河朔擢第累遷是官歲滿以太子洗馬趙瑜代瑜趙州人家世豪右自言諳練邊事開寶中命爲易州通判歲滿移桂陽至卽稱疾遂以著作郎張侃代之侃至月餘奏瑜在任累月得羨銀數千斤雖送官而不具數聞計樞與璘隱沒可知矣詔下御史按之獄具有司計盜賊法俱當死太祖曰趙瑜非自盜但不能發擗耳樞璘並坐死瑜決杖流海島擢侃爲

屯田員外郎

宋史

曹彬字國華正定靈壽人父芸成德軍節度都知兵馬使彬生周歲其家設辟盤

弘簡錄

觀所取彬左手持干戈右手持俎

原书缺页

曰豈有國戚近臣而衣弋綈袍坐素胡牀者乎審視之方信
遷引進使初太祖典禁旅彬中立不倚非公事未嘗造門羣
居讌會亦所罕預由是器重焉建隆二年自平陽歸名謂曰
我疇昔常欲親汝汝何故疏我彬頓首謝曰臣爲周室近親
復忝內職安敢妄有交結遷客省使與王全斌郭進領騎兵
攻河東平樂縣降其將王超侯霸榮等千八百人俘獲千餘
人旣而其將率兵來援三戰皆敗之遂建平樂爲平晉軍乾
德初改左神武將軍時初克遼州河東召契丹六萬騎來攻
平晉彬與李繼勳等大敗之于城下俄兼樞密承旨二年冬
伐蜀詔以劉光毅爲歸州行營前軍副部署彬爲都監峽中
郡縣悉下諸將咸欲屠城以逞其欲彬獨申令戢下所至悅
服上降詔褒之兩川平全斌等晝夜宴飲不飭軍旅蜀人苦

之彬屢請旋師全斌等不從全師雄等尋構亂號稱十萬彬復與光毅破之于新繁卒平蜀亂諸將多取子女玉帛彬橐中唯圖書衣衾而已及還上盡得其狀以全斌等屬吏謂彬清介廉謹授宣徽南院使義成宣節度使彬入見辭曰征西將士俱得罪臣獨受賞恐無以示勸

宋史

上曰卿功高不伐設

有微累全斌等豈惜言哉夫懲惡勸善朕所以勵臣下也彬乃不敢辭

東都事略

六年遣李繼勳党進率師征太原命爲前軍

都監戰洞渦河斬二千餘級俘獲甚眾開寶二年議親征復命爲前軍都監率兵先往次團柏谷降賊將陳廷山又戰城南薄濠橋奪馬千餘六年進檢校太傅七年將伐江南九月彬奉詔與李漢瓊田欽祚先赴荆南發戰艦潘美帥步兵繼進十月詔以彬爲昇州西南路行營馬步軍戰權都部署分

兵由荆南順流而東破峽口砦進克池州連克當塗蕪湖二

縣駐軍采石磯十一月作浮梁跨大江以濟師十二月大破

其軍于白鷺洲八年正月又破其軍于新林港二月師進次

秦淮敗江南水陸師十餘萬俘斬數萬計八月克潤州圍金

陵李煜遣其臣徐鉉奉表詣闕乞緩師

宋史

彬亦爲緩攻冀其

歸服且使人諭之曰事勢已如此所惜者一城生民耳若能

歸命策之上也城垂克彬忽稱疾不視事諸將皆來問疾彬

曰余疾非藥石所能愈惟諸公誠心自誓不妄殺一人則自

愈矣諸將許諾共焚香爲誓明日稱愈遂克金陵城中皆安

堵如故

東都事略

煜與其臣百餘人詣軍門請罪彬慰安之待以

賓禮請煜入宮治裝彬以數騎待宮門外左右密謂彬曰煜

入或不測奈何彬笑曰煜素悞無斷旣已降必不能如此煜

之君臣卒賴保全自出師至凱旋士眾畏服無輕肆者及入
見刺稱奉敕江南幹事回人服其謙初彬之總師也太祖謂
曰俟克李煜當以卿爲使相副帥潘美預以爲賀彬曰不然
夫是行也仗天威遵廟謨乃能成事吾何功哉況使相極品
乎美曰何謂也彬曰太原未平耳及還獻俘上謂曰本授卿
使相然劉繼元未下姑少待之既聞此語美竊視彬微笑上
覺遽詰所以美不敢隱遂以實對上亦大笑乃賜彬錢二十
萬彬退曰人生何必使相好官亦不過多得錢耳未幾拜樞
密使檢校太尉忠武軍節度使太宗卽位加同平章事議征
太原召彬問曰周世宗及太祖皆親征何以不能克彬曰世
宗時史彥超敗于石嶺關人情驚擾故班師太祖頓兵甘草
地會暑雨軍士多疾因是中止太宗曰今吾欲北征卿以爲

何如彬日以國家兵甲精銳翦太原之孤壘如摧枯拉朽耳
何爲而不可太宗意遂決太平興國三年進檢校太師從征
大原加兼侍中八年爲弭德超所誣罷爲太平軍節度使旬
餘上悟進封魯國公待之愈厚雍熙三年詔彬將幽州行營
前軍馬步水陸之師與潘美等分路北伐三月敗契丹于固
安破涿州大破契丹援師于城南四月又與米興被契丹于
新城斬首二百級五月戰于岐溝關諸軍敗績退屯易州臨
易水而營上聞亟令分屯邊城追諸將歸闕先是賀令圖等
言於上曰契丹主少母后專政寵倖用事請乘其釁以取幽
薊遂遣彬與崔彥進米信自雄州田重進趣飛狐潘美出雁
門約期齊舉將發上謂之曰潘美之師但先趣雲應卿等以
十萬眾聲言取幽州且持重緩行不得貪利彼聞大兵至必

悉眾救范陽不暇援山後矣既而美之師先下襄朔雲應等
州重進又取飛狐靈邱蔚州多得山後要害地彬亦連下州
縣每奏至上輒訝彬進軍之速及彬次涿州旬日食盡因退
師雄州以迎饋餉上聞之曰豈有敵人在前反退軍耶失策
甚矣亟遣使命彬急引師緣白溝河與米信軍會按兵養銳
以張西師之勢俟美等盡略山後地會重進之師而東合勢
以取幽州時彬部下諸將聞美及重進累建功而已握重兵
不能有所攻取謀議蜂起彬不得已乃再往攻涿州契丹師
甚眾時又甚暑軍士乏困糧且盡彬復退軍遂爲所躡而敗
彬等至詔鞠於尙書省令翰林學士賈黃中等雜治之彬等
具伏違詔失律之罪彬責授右驍衛上將軍彥進右武衛上
將軍信右屯衛上將軍四年起彬爲侍中武甯軍節度使涪

化五年徙平盧軍節度真宗卽位復檢校太師同平章事數月召拜樞密使咸平二年被疾上趣駕臨問手爲和藥且賜白金萬兩問以後事對曰臣無事可言臣二子材器可取臣若內舉皆堪爲將上問其優劣對曰璨不如瑋六月薨年六十九上臨哭之慟對輔臣語及彬必流涕贈中書令追封濟陽郡王謚武惠贈其妻高氏韓國夫人官其親族門客親校十餘人八月詔彬與趙普配饗太祖廟庭彬性仁敬和厚在朝廷未嘗忤旨亦未嘗言人過失伐二國秋毫無所取位兼將相遇士夫於途必引車避之不名下吏每白事必冠而後見俸入散給宗族無餘積平蜀回太祖從容問官吏善否對曰軍政之外非臣所聞也固問之唯薦隨軍轉運使沈倫廉謹可任爲帥知徐州日有吏犯罪旣具案踰年而後杖之人

莫知其故彬曰吾聞此人新娶婦若杖之其舅姑必以婦爲不利而朝夕笞詈之使不能自存吾欲緩其事然法亦未嘗屈焉北征之失律也趙昌言表請行軍法及昌言自延安還被劾不得入見彬在右府爲請於上乃許朝謁子璨珣璋玳玳珣琮琬娶秦王女興平郡主至昭宣使玳左藏庫副使玳尙書虞部員外郎珣東上閤門使琮西上閤門副使玳之女卽慈聖光獻皇后也芸累贈魏王彬韓王玳吳王諡曰安禧

宋史

高懷德字藏用正定常山人周天平節度齊王行周之子懷德忠厚倜儻有武勇行周歷延路二鎮及留守洛都節制宋亳皆署以牙職晉開運初遼人侵邊以行周爲北面前軍都部署懷德始冠自行周願從北征行周壯之許其行至戚城

遇遼軍被圍數重援兵不至危甚懷德左右射縱橫馳突眾皆披靡挾父而出以功領羅州刺史賜珍裘寶帶名馬以寵異之及行周移鎮鄆州改集州刺史仍領牙校又遷信州刺史從行周再鎮宋州晉末契丹南侵以行周爲邢趙路都部署禦之留懷德守睢陽會杜重威降契丹京東諸州羣盜大起懷德堅壁清野敵不能入行周率兵歸鎮敵遂解去漢初行周移鎮魏博及再領天平以懷德爲忠州刺史領職如故周祖征慕容彥超還過汶上賜行周甚厚並賜懷德衣帶綵繪鞍勒馬行周卒召懷德爲東西班都指揮使領吉州刺史改鐵騎都指揮使太原劉崇入寇世宗討之以懷德爲先鋒都虞侯高平克捷以功遷鐵騎右廂都指揮使領果州團練使從征淮南知廬州行府事充招安使戰廬州城下斬首七

百餘級尋遷龍捷左廂都指揮使領岳州防禦使賜駿馬七匹南唐將劉仁瞻據壽春舒元據紫金山置連珠砦爲援以抗周師世宗命懷德率數十騎覘其營壘懷德夜涉淮遲明賊始覺來戰懷德擒其裨將以還盡偵知其形勢強弱以白世宗世宗大喜賜襲衣金帶器幣銀鞍勒馬世宗一日按轡淮壩以觀賊勢見一將追擊賊眾奪槩以還令左右問之乃懷德也召至行在慰勞許以節鉞世宗北征命與韓通率兵先抵滄州初得關南又命副陳思讓爲雄州兵馬都部署克瓦橋關降姚內斌以歸恭帝嗣位擢爲侍衛馬軍都指揮使領江甯軍節度又爲北面行營馬軍都指揮使太祖卽位拜殿前副都點檢移鎮滑州充關南副都部署尙宣祖女燕國長公主加駙馬都尉李筠叛上黨帝將親征先令懷德率所

部與石守信進攻破筠眾于澤州南事平以功遷忠武軍節
度檢校太尉從平揚州建隆二年改歸德軍節度開寶六年
秋加同平章事冬長公主薨去駙馬都尉號太宗卽位加兼
侍中又加檢校太師太平興國三年春被病詔太醫王元祐
道士馬志就第療之四年從平太原改鎮曹州封冀國公七
年改武勝軍節度是年七月卒年五十七贈中書令追封渤
海郡王謚武穆懷德將家子練習戎事不喜讀書性簡率不
拘小節善音律自爲新聲度曲極精妙好射獵嘗三五日露
宿野次獲狐兔累數百或對客不揖而起由別門引數十騎
從禽于郊子處恭厯莊宅使至右監門衛大將軍致仕處俊

至西京作坊使

宋史

楊廷璋字溫玉正定人家世素微賤有姊寡居京師周祖微

時欲聘之姊不從令媒氏傳言恐逼姊以告廷璋廷璋往見周祖歸謂姊曰此人姿貌異常不可拒姊乃從之周祖從漢祖鎮太原廷璋屢省其姊周祖愛其純謹姊卒留廷璋給事左右及出討三叛入平國難廷璋數獻奇計卽位追冊廷璋姊爲淑妃擢廷璋爲右飛龍使廷璋固辭不拜願推恩其父洪裕卽令召洪裕赴闕以老病辭就拜金紫光祿大夫眞定少尹廷璋歷皇城使昭義兵馬都監澶州巡檢使世宗自澶淵還京言廷璋有幹材遷客省使俄爲河陽巡檢知州事涇帥史懿稱疾不朝周祖命廷璋往代之將行謂之曰懿不就命卽圖之廷璋至屏左右以詔書示懿諭以禍福懿卽日就途俄聞周主崩嘔血不食者數日世宗立拜左驍衛大將軍充宣徽北院使征劉崇以爲建雄軍節度在鎮數年頗有惠

愛屢率兵入太原境拔仁義高壁等砦獲刺史軍校數十人
俘其民數千戶獲兵器羊馬數萬計并人棄沁州二百里退
保新城廷璋遂置保安興同白壁等十餘砦會隰州刺史孫
議卒

宋史

廷璋遣監軍李謙溥攝州事謙溥至隰并人來圍城

或請速救之廷璋曰賊乍至未能遽攻城

東都事略

當出奇以破

之乃募敢死士百餘人許以重賞由間道約謙溥爲內應乃
銜枚夜擊城中鼓譟以出并人大潰斬首千餘級獲器甲萬
計奏至世宗喜曰吾舅眞能禦寇詔褒之世宗自河東還加
檢校太保顯德六年夏率所部入河東界下堡砦十三降巡
檢使靳漢晁等三人恭帝卽位加檢校太傅宋初加檢校太
尉吏民詣闕請立碑頌功德太祖命盧多遜撰文賜之李筠
叛潛遣使齎蠟書求援鄰境廷璋獲之械送京師因上攻取

之策卽下詔委以經略及車駕親征詔廷璋率所部入陰地分賊勢賊平歸鎮是秋來朝改鎮邠州乾德四年移鄜州開寶二年召爲右千牛衛上將軍四年卒年六十賻帛二百匹廷璋美髯長上短下好修容儀雖見小吏未嘗懈惰善待士幕府多知名人在晉州日太祖命判軍儒爲鈐轄軍儒以廷璋周朝近親疑有異志每入府中從者皆持刀劍欲圖廷璋廷璋推誠待之殊不設備軍儒亦不敢發終亦無患議者以廷璋在涇州保全史懿陰德之報也洪裕少時嘗漁于貂裘陂忽有馳騎至者以二石雁授洪裕一翼掩左一翼掩右曰吾北嶽使者也言訖忽不見是年生淑妃明年生廷璋家遂昌盛廷璋子七人皆不爲求官惟表其孤甥安崇勳得四頭供奉官崇勳後唐樞密使重誨子也廷璋子垣墳皆進士及

第垣至屯田員外郎鹽鐵副使判官墳爲都官郎中

宋史

趙晁正定人初事杜重威爲列校重威誅屬周祖鎮鄴中晁因隸麾下周祖開國擢爲作坊副使慕容彥超據兗州叛以晁爲行營步軍都監兗州平轉作坊使晁自以逮事霸府復有軍功而遷拜不滿所望居常怏怏時樞密使王峻秉政晁疑其軋已一日使酒詣其第毀峻峻不之責世宗嗣位改控鶴左廂都指揮使領賀州刺史從征劉崇轉虎捷右廂都指揮使領本州團練使兼行營步軍都指揮使軍至河內世宗意在速戰令晁倍道兼行晁私語通事舍人鄭好謙曰賊勢方盛未易敵也宜持重以挫其銳好謙以所言入白世宗怒曰汝安得此言必他人所教言其人則舍爾不言當死好謙懼遂以實對世宗卽命并晁械于州獄軍迴始赦之及征淮

南改虎捷左廂領閩州防禦使充前軍行營步軍都指揮使
又爲緣江步軍都指揮使時李重進敗吳人于正陽以降卒
三千人付晁晁一夕盡殺之世宗不之罪壽春平拜檢校太
保河陽三城節度孟懷等州觀察措置等使恭帝卽位加檢
校太傅宋初加檢校太尉未幾以疾歸京師卒年五十二太
祖甚悼之贈太子太師再贈侍中晁身長七尺儀貌雄偉好
聚斂處方鎮以賄聞以周初與宣祖分掌禁軍有宗盟之分
故太祖常優禮之再加贈典焉子延溥周顯德中以父任補
左班殿直宋初爲鐵騎指揮使開寶初太祖親征晉陽太宗
守京邑延溥以所部爲帳下牙軍轉殿前散員指揮使九年
改鐵騎都虞候太宗卽位遷散指揮都虞候領思州刺史太
平興國二年轉內殿直都虞候三年改馬步軍都虞候從平

太原略地燕薊六軍扈從有後期至者帝怒欲置于法延溥
遂進曰陛下巡行邊陲以防禦外侮今契丹未殄而誅譴將
士若舉後圖誰爲陛下戮力乎帝嘉之師還遷內外馬步軍
都軍頭領本州防禦使五年殿前白進超卒卽日以延溥爲
日騎天武左右廂都指揮使兼權殿前都虞候事坐遣親吏
市竹木所過關渡矯稱制免算責授登州團練使令赴任是
冬帝北巡至太名復以延溥爲本州防禦使卽命爲幽州東
路行營濠砦都監詔修緣邊城壘踰年加涼州觀察使仍判
登州又爲鎮州兵馬都部署俄判霸州雍熙二年改蔚州觀
察使判冀州會命曹彬等北征又與內衣庫使張紹勅引進
副使董愿爲幽州西北道行營都監師還命知貝州改滑州
部署四年再知貝州以疾求代代未至卒年五十贈天德軍

節度子承彬至內殿崇班承彬子咸一爲虞部員外郎知宗
正丞事咸熙天聖八年進士及第

宋史

閻承翰正定人周顯德中爲內侍入宋事太祖以愿稱太宗
時數遷至內殿崇班以入作司隱匿材木建議於都城西置
事材場治材以給之雍熙中知廣州徐休復劾轉運使王延
範詔遣承翰往同捕鞠延範遂坐誅李順叛命爲川峽招安
都監賊平授西京作坊副使眞宗卽位進作坊使內侍左班
副都知咸平三年河決鄆州王陵埽命承翰護塞時議徙鄆
州以避河患詔承翰與工部郎中陳若拙乘傳規度徙於舊
治之東南五年入內都知韓守英爲鎮定高陽關三路排陣
都鈐轄上以守英不足任令承翰代之時中山屯兵甚眾若
轉輸承翰請鑿渠引唐河水自嘉山至定州三十二里又至

蒲陰東六十二里合沙河經邊吳堡入界河以便饋運並於
旁爲方田允行人以爲便詔褒之景德初契丹謀寇順安軍
承翰奉詔發雄霸兵往禦俄又遣詣德清軍修城壘二年加
領廉州刺史勾當羣牧司尋兼羣牧副使領國信司主與契
丹交聘之事大中祥符初改西京左藏庫使充趙德明加恩
告官使還請于蒲洛河置館待夏進奉使不許四年遷內園
使左班都知領獎州團練使其姻趙守倫爲西京左藏庫副
使久典廐牧至是又掌估馬與承翰聯職不相得各以詞訴
並付御史臺承翰坐擅用羣牧司錢當贖金三十斤守倫坐
違制當免官詔承翰贖金十斤守倫贖金二十斤六年上製
內侍箴賜之承翰表請刻石省中明年建應天府爲南京作
鴻慶宮設太祖太宗像遣承翰自京奉安授南作坊使入內

都知卒年六十八贈懷州防禦使子文應官西京左藏庫使

宋史

石知顒正定人建隆中授內中高品太宗卽位改供奉官雍熙中隨諸將征幽薊歸掌儀鸞司淳化時詔往明州經置市舶司轉內殿崇班親王諸宮都監從王繼恩平蜀寇就遷西京作坊副使咸平初遷正使帶御器械契丹犯邊上親往命爲天雄軍澶州巡檢使俄改德博等州緣河巡檢使兼安撫加領長州刺史三年詔戍正定高陽關三路尋改高陽關駐泊行營鈐轄歸朝復掌親王諸宮事景德中自京抵泗治河隄浹旬而畢上面加褒諭賜白金千兩授入內都知大中祥符初遷內園使坐定內侍遷秩不當罷都知三年爲并代州鈐轄遷莊宅使徙正定高陽關鈐轄四年命修太祖神御殿

復掌羣牧司三班院親王諸宮事天禧二年授并代州鈐轄兼管勾麟府路軍馬事三年卒年六十九孫全彬字長卿以知願奏補內小黃門累遷西頭供奉官仁宗時奉詔祭南海并密察所過吏治民俗還具以對帝嘉其忠盜殺鳳州巡檢

全彬奉詔往詰盜卽擒滅元昊叛圍延州全彬監鄜州兵往

救圍遂解以經略使明鎬薦除并代州都監加內侍押班進

鈐轄徙鄜延復還爲押班宋史任湖南江西安撫副使討儂智

高出桂林願獨當一隊以自效狄青使將左哨力戰于邕州

事平領綿州防禦使提舉張貴妃甯華殿閣妃薨治喪甚奢

進宮苑使利州觀察使給兩使留後俸弘簡錄尋遷入內副都

知制誥劉敞封還詔書居三月復授之轉信武軍留後爲

永昭陵鈐轄時距永定復土四十二年籍多散失全彬工心

計事甚洽遷福延宮使提點奉先院熙甯中卒年七十六贈太尉定武軍節度使諡恭僖

宋史

秦翰字仲文獲鹿人年十三爲黃門開寶中遷高品太平興國四年監崔彥進兵擊契丹以善戰聞太宗嘉之數遷至入

內押班

弘簡錄

趙保忠叛詔翰監李繼隆軍往討及延州翰慮

保忠遁乃乘驛先往矯詔安撫且勸保忠郊迎繼隆因並驅而出保忠遂就擒以功加崇儀副使數遷至入內副都知咸

平中授正定高陽關排陣都監大敗契丹于莫州東盡奪所

掠老幼詔褒之徙定州行營鈐轄王均之亂爲川陝招安巡

檢使親督眾擊賊中流矢不稍卻遂五戰五捷克益州上手札勞問翌日進至廣都斬首千餘獲馬數千還遷內團使積

恩州刺史出爲正定高陽關前後陣鈐轄破契丹二萬于威

虜軍西俘其大將鐵林等十五人改邠甯涇原路鈐轄兼安撫都監率所部拔行山外召戎落酋帥諭以恩信於是三千餘帳皆來歸未幾康奴族拒命翰與陳興許均擊斬數千焚其廬帳獲其牛馬甚眾尋復襲殺其童埋軍主干武延臧泊川詔書嘉獎賜袍帶金帛景德初車駕將北巡遣翰乘傳先往相度兵形許便宜從事俄充邢洛路鈐轄與大軍會德清軍相犄角改駕前西面排陣鈐轄管勾大陣督眾浚濠隍甫畢契丹兵大至翰甲冑七十餘日契丹乞和翰留駐澶州月餘始還加宮苑使入內都知出爲涇原儀渭鈐轄度險要鑿巨塹計工三十萬皆役卒而不擾于民就遷皇城使入內都知以其久勤邊陲故特遷此以寵異之翰表辭不許大中祥符初改昭宣使歷羣牧副使從上祀汾陰凡行在諸司細務

悉令裁決禮畢加領平州團練使復從上祀亳州八年營葺
大內詔翰參領其事閏六月暴卒年六十四上悼惜泣下賻
襚有加贈貝州觀察使內修既畢詔以襲衣金帶賜其家翰
倜儻有武力以方略自許前後戰鬥凡被四十九創李繼遷
之未賓也翰因使常出入其帳中嘗言臣一內官不足惜願
手刺此賊死無所恨太宗深嘉之性溫和謹慎而輕財好施
士樂爲用亦能得羣帥歡其沒也禁旅有泣下者九年重贈
彰國軍節度詔楊億撰碑子懷志官內殿崇班

宋史

張崇貴正定人太祖時爲內中高品遷殿頭太平興國中以
善射選御帶錢俶納土命馳閱城防儲侍從征太原偕崔彥
進李漢瓊先行視水草端拱初補內供奉官淳化四年命乘
傳之延州招羌戎內坊轉內班右押班就管勾鄜延屯兵李

繼隆討李繼遷詔以延安兵犄角及擒趙保忠與石霸留守
綏州徙平夏民以實之繼遷阻橐駝路逼脅內屬戎人崇貴
與田敏率兵與戰斬首三千餘大獲牛羊橐駝鎧甲疊詔褒
嘉繼遷走沙漠遣其將來求納款崇貴厚犒之會改內班爲
黃門遂爲黃門右押班知內殿崇班尋又改黃門爲內侍繼
遷貢駝馬待罪詔崇貴往賜器幣茶藥衣物至道元年進崇
儀副使內侍右班副都知繼遷復叛圍靈州廷議欲棄靈州
命崇貴乘傳往度乃益兵固守就命爲靈環慶州清遠軍路
監軍兼排陣都監眞宗立拜洛苑使右班都知管勾并州軍
馬趙保吉遣使人貢命崇貴奉詔授以定難節度兼賜器幣
使還加六宅使咸平元年詔管勾鄜延屯兵泊延安改駐泊
都監進鈴轄繼遷復內擾崇貴與張守恩王榮疊擊敗之再

詔褒慰四年召歸領獎州刺史復蒞鄜延仍制置沿邊青白
鹽事與衛超領軍入敵境焚廬帳獲牛羊廩餼復被詔獎崇
貴屢訶契丹事以聞且請身當一隊爲先鋒不許景德元年
保吉死崇貴移書其子德明諭以恩信德明乃請俟釋服歸
命自是邊防事宜皆崇貴主之二年春召還朝面授方略乃
許德明以定難節度西平王賜金帛緡錢各四萬茶二萬斤
給內地節度俸聽回圖往來放青鹽禁凡五事而令德明居
平夏納靈州遣子弟入宿衛送掠去官吏盡散蕃漢兵并質
口封境之上有侵擾者稟朝旨凡七事德明以子弟入質及
納靈州爲難乃如舊禁鹽不許回圖三年九月德明以誓表
來上崇貴因請入朝許之以功拜皇城使內侍左右班都知
領博州團練使詔持旌節誥命授德明四年使還召對于瓊

林苑卽命爲行宮使是秋復還延安大中祥符元年加昭宣使崇貴久歷邊陲西人畏服凡疆場之事皆先付裁度卽文移至環慶者亦付延州議焉二年乞歸葬父母許之錫賚甚厚復命爲都鈐轄提舉權場聽歲入奏事四年八月卒年五十七贈豐州觀察使內侍護喪還京師子承素官東染院副使

宋史

王守規欒城人入內副都知守忠之弟守忠事眞宗謹愿慎密眷遇最厚明道時守規爲小黃門禁中夜半火守規先覺自寢殿至後苑皆擊去其鎖乃奉仁宗及皇太后至延福宮回視所經處則已灰燼矣翌日執政候起居帝曰非王守規導朕至此幾不與卿等相見以功遷入內殿頭選治京城水決汴河于公買村決蔡河于四里橋水患以息加帶御器械

積官至宣慶使康州防禦使內侍右班副都知卒年六十七

贈昭武將軍留後

宋史

順德府

王仁鎬邢州龍岡人後唐明宗鎮邢臺署爲牙校卽位擢爲
作坊副使累遷西上閣門使清泰中改右領軍衛將軍晉天
福中青州楊光遠將圖不軌以仁鎬爲節度副使伺其動靜
歷二年或譖仁鎬于朝改護國軍行軍司馬仁鎬至河中數
月光遠反書聞漢乾祐中歷昭義天雄二軍節度副使周祖
鎮鄴表仁鎬爲副留守及起兵仁鎬預其謀周祖卽位仁鎬
爲王峻所忌出爲唐州刺史遷棣州團練使入爲右衛大將
軍充宣徽北院使兼樞密副使顯德初出爲永興軍節度使
世宗嗣位移河中會殿中丞上官瓚使河中還言河中民多

匿田租遂遭瓚按視均定百姓苦之多逃亡他郡仁鎬抗論其事乃止丁繼母憂五年拜安國軍節度制日奢惟襄國實卿故鄉分子龍節之權成爾錦衣之美郡民扶老攜幼迎于境上有獻錦袍者四仁鎬皆重衣之厚酬以金帛視事翌日省其父祖之墓周視松楸涕泗嗚咽時人美之郡有羣盜仁鎬遣使遺以束帛諭之悉遁去不復爲盜恭帝嗣位移山南東道節度宋初加檢校太師建隆二年以疾召還次唐州卒於傳舍年六十九仁鎬性端謹儉約崇信釋氏所得俸祿多奉佛飯僧每晨誦佛經五卷或至日盱方出視事從事劉謙責仁鎬曰公貴爲藩侯不能勤恤百姓孜孜事佛何也仁鎬斂容遜謝無愠色當時稱其長者

宋史

張思鈞沙河人祖中正漢澤州刺史思鈞善擊劍挽強應募

爲卒晉開運間遷廣銳軍使周廣順初從攻河東敗其軍三
千餘從東征爲捉生將有功從戰代州任南北兩關巡檢宋
初補龍衛指揮使從李繼勳下遼州戰帶甲祠斬首萬餘追
奔至長城擒其將莫山鮑淑掠人騎二百餘遂屯潞州歷三
十餘戰乾德中遷都虞候開寶三年從郭進田欽祚戰于石
嶺關斬首萬五千餘閤門祇候齊延琛苗景陷圍中思鈞率
銳師往救乃免從何繼筠入太原境拔南橋徑度太平興國
初屯定州率兵援磁窯身中五十創戰益力遂大勝奪馬及
鎧甲甚多未幾契丹復擾邊率兵逆戰斬首萬餘賜袍帶領
河州刺史雍熙三年契丹寇河間從劉廷讓戰君子館時天
大寒弓瑟縮不能挽援兵不至遂大敗陷契丹端拱初逃歸
授澄州刺史知齊州以不諳政事踰月改濮鄆濱棣州巡檢

至道中移鄜延葺石堡砦寇至擊走之未幾寇逼保安軍與曹璨往援寇遁去真宗卽位徙益州鈐轄兼綿漢九州都巡檢使咸平中王鈞叛率兵保綿州攻復漢州斬僞刺史苗進又與石普敗賊于彌牟砦恃功漸驕蹇間巴西尉傅翱有善馬欲得之不獲乃責翱以轉餉後期斬之上聞付御史臺鞠治罪當斬予輕典削籍流封州六年起爲左司禦率府率考城監軍上幸澶淵召詣行在議兵事賜服御甚渥景德二年爲西京水北都巡檢使尋分司西京召對行在上憫其老授唐州防禦副使徙鄭州大中祥符二年再遷左千牛衛將軍四年七月卒年八十九子承恩爲三班奉職

宋史

張美字元珪貝州清河人

今廣宗縣

少善書計初爲左藏小吏以

強幹聞特補本庫專知出爲澶州糧料使周世宗鎮澶淵每

有求取美必悉力應之周祖聞之怒徙爲濮州馬步軍都虞候世宗卽位召爲樞密承旨時宰相景範判三司被疾乃命美爲右領軍衛大將軍權判三司世宗征淮南留美爲大內部署一日方假寐忽覺心動遽驚起周視宮城少頃內醞署火起卽撲滅之俄眞授三司使四年世宗再幸淮上皆爲大內都點檢北征又爲大內都部署師還爲左監門衛上將軍充宣徽北院使判三司美強力有心計世宗連歲征討糧饋不乏深委賴焉然以澶淵事頗薄之恭帝嗣位加檢校太傅宋初加大尉初李筠鎮上黨募亡命多爲不法美度筠必叛積粟淮孟間後筠叛太祖親征大軍十萬出太行經費無闕美有力焉拜定國軍節度觀察官市木關中同州歲出糴錢數十萬以假民長吏十取其一謂之率分錢歲至數百萬美獨

不取未幾他郡有詣闕訴長吏受率分錢者皆命償之乾德五年移鎮滄州太平興國初來朝改左驍衛上將軍美獻都城西河曲灣果園二蔬圃六亭舍六十餘區八年請老以本官致仕雍熙二年卒年六十八淳化初諡恭惠子守瑛至供備庫使孫士宗至內殿承制士宗卒士禹爲崇班士安至閤門祇候士宣爲禮殿副使

宋史

廣平府

解暉洺州臨洺人父珪應募爲州兵後唐天成中西征至劍門沒于陣暉少有勇力以父死戎事隸兵籍戍雁門以功遷奉國軍隊長晉天福中安重榮反鎮州因舉兵向關至宋城晉師逆戰大破之暉率壯士百餘人復夜擣其壘殺獲甚眾以功遷本軍列校周廣順初劉崇與契丹侵晉州暉從都部

署樞密使王峻等往援率敢死士三千餘夜襲契丹殺獲甚
眾遷本軍第五指揮使從世宗征淮南率所部下黃州禽刺
史高弼遷虎捷第一軍都虞候宋初步軍都軍頭從征澤州
力戰目中流矢師還策勳爲內外馬步軍副都軍頭建隆四
年充湖廣道行營前軍戰擢都指揮使潭州平降璽書獎諭
僞統軍黃從志據岳州暉率舟師討平之生禽從志及將校
十四人俘斬數千溺死者眾改控鶴右第二軍都指揮使領
高州刺史乾德六年詔領所部軍屯上黨從李繼勳略太原
開寶九年破太原軍于境上斬首千餘級獲馬三十匹改均
州刺史太平興國二年詔于潞州北築城名威勝軍以暉爲
軍使從征并州與尙食使石彥贇率所部下隆州殺并州人
三百餘禽招討使李詢等六人以獻于行在所賜子有加復

令與彥贇督戰士隸城西行營分攻太原劉繼元降太宗以太原宮女三人賜暉俄以功遷本州團練使知霸州雍熙初充雲應寰朔忻代等州都巡檢使三年代歸本郡淳化二年被病上章告老改右千牛衛上將軍致仕詔未至而卒年八十暉鷙猛木強每受詔征伐常身先之人所憚者暉視之若甚易由是頻立戰功金創徧體時稱驍將子守顯至內殿崇班閤門祇候

宋史

丁德裕洺州臨洺人父審琦彰武軍節度周廣順初以廕補供奉官宋初歷通事舍人西上閤門副使建隆三年遷東上閤門使從慕容延釗平荆湖以功授引進使又與潘美尹崇珂克郴州遷客省使乾德五年遷內客省使時成都初平羣寇太起用爲西川都巡檢使與閤門副使張延通同率師討

之擒賊帥康祚磔于市歲餘盡平其黨頗與延通不協歸朝告其陰事延通坐棄市又奏轉運使禮部郎中李鉉嘗醉酒言涉指斥上怒驛召鉉下御史按之鉉言德裕在蜀日屢以事請求多拒之皆有狀御史以聞太祖悟止坐鉉酒失責授左贊善大夫未幾德裕亦出知潞州會征江南遣德裕爲常州行營兵馬都監領吳越兵助主帥進討常州平命權知州事又改昇州東南路行營都監敗潤州軍五千餘于城下及拔潤州移領常潤等州經略巡檢使德裕以傾險爲眾所惡恃勢剛狠不恤士卒黷貨無厭越人苦之錢俶奏其事貶房

州刺史卒

宋史

大名府

王明字如晦大名成安人晉天福中舉進士不第驍騎將藥

元福爲原州刺史辟爲從事馮暉節制靈武表爲觀察巡官
周廣順初元福領陳州防禦使奏署判官會劉崇寇晉州命
元福將兵援之事多咨于明先是州縣吏送丁壯糧餉一夕
夫盡遁去元福怒盡驅官吏出軍門將就戮明馳往止之入
白元福曰今軍儲無闕丁夫數萬人文吏懦不能制斬之何
益不如寬以待之賊敗凱旋公無專殺之名不亦善乎元福
感悟盡免其死旣而崇眾宵遁卽命元福爲建雄軍節度留
鎮因奏署明爲書記賜緋魚顯德初元福移鎮陝恃功多驕
恣明以直道規之忤其左右多毀明于元福元福亦稍疏之
明以父病求歸省元福數召明明因謝絕之詣闕上書求在
州縣厯清平鄆城二縣令宋初荆南高繼沖入覲授彭門節
鉞以明爲武甯軍節度掌書記乾德初召公卿近臣各舉清

白有吏幹者一人給事中馬士元薦明召爲左拾遺蜀平選
知榮州代歸遷右補闕會用兵于嶺南選爲荆湖轉運使開
寶三年大舉南征以明爲隨軍轉運使山路險絕舟車不通
但以丁壯數萬人轉遞供億不闕每下一郡一城必先保其
簿書守其倉庫旣而賀州未下明入與主帥計曰當急取之
恐援兵至至則我師勝負未可知諸將頗猶豫明乃擐甲胄
率所部護送輜重卒百人擁丁夫數千畚鍤皆作堙其塹直
抵城門城中懼遂開門納款因抵廣州賊眾十餘萬拒戰是
夕大風發屋折木明與都部署潘美等謀命丁夫數千人
持二炬間道先搗賊壘大軍蓐食陣以待之俄而萬炬皆發
焚其柵賊驚果來犯大軍因迎擊之賊大敗斬首數萬劉鋹
以城降廣州平爲本道轉運使太祖嘉其功擢授祕書少監

領韶州刺史充轉運使俄以潘美尹崇珂爲嶺南轉運使以明爲副使明徧歷部內視民疾苦凡無名科斂悉條奏除之嶺表遂安七年代歸帝召見勞問賜襲衣金帶鞍馬是歲將用師南唐以明爲黃州刺史帝密授成算明旣視事卽完葺城壘訓練士卒眾莫解其意俄而王師自荆渚乘戰艦而下卽以明爲池州至岳州江路巡檢戰檣都部署擊鄂州軍于江南斬首三百級又破萬餘人于武昌殺江南軍七百人拔樊山砦破江州軍斬首二千級又破江南軍三百人于江中獲船十餘艘又擊敗湖口軍萬餘奪戰艦五百艘時南唐將朱令贇自上江領眾十五萬連大艦沿流而下將焚采石浮梁抵金陵爲援明率所部舟師屯獨樹口遣其子馳奏請添造戰艦三百艘以襲令贇帝曰非應急策也令贇朝夕至金

陵之圍解矣乃密遣人諭明令樹長木于洲浦間若帆檣之狀令贊望見之果疑大軍襲其後逗撓不敢進明移檄諸軍相爲犄角因督兵襲之至小孤山與諸軍合勢大破之擒令贊眾赴水死者十五六金陵平詔明安撫諸郡因命知洪州太宗卽位兼領江南諸路轉運使詔爲右諫議大夫充三司副使太平興國七年與侯陟同判三司事八年召分三司各命使領之改左諫議大夫爲鹽鐵使遷給事中雍熙四年改光州刺史出知并州端拱元年代還表求換秩改禮部侍郎會契丹擾邊詔以明知正定府契丹遁去淳化初詔歸闕知京朝官差遣事二年卒年七十三子挺扶並進士及第歷臺省累爲轉運使皆知名挺至殿中侍御史扶常直集賢院至工部員外郎景德中錄幼子揆爲光祿寺主簿大中祥符八

年又錄其孫師顏爲三班借職揆至殿中丞

宋史

馬令琮本名令威避周祖名改琮大名人父全節五代史有傳全節歷橫海定遠昭義彰德定武天雄六節度皆署令琮爲牙校累授彰德牙內都指揮使檢校尙書左僕射領勤州刺史令琮善騎射嘗從其父平安州及與鎮州安重榮戰皆有功由是知名晉開運二年全節卒令琮起復拜隰州刺史漢祖開國爲西京巡檢使周祖受命改陳州刺史征兗州爲京城四門外巡檢世宗嗣位移隨州顯德二年入爲虎捷左第一軍都指揮使六年兼領建州刺史太祖卽位出刺懷州李筠叛將親征召三司張美餉兵食美言河內密邇上黨令琮日夜儲蓄以俟王師太祖善之命授團練使執政言令琮方供億大軍不可移他郡故升懷州爲團練以令琮充使又

充先鋒都指揮使澤潞平爲昭義兵馬鈐轄踰年被疾詔許歸郡乾德元年卒年三十九太祖甚憐之錄其子延恩爲殿

直

宋史

趙玘澶州人家富於財晉天福中納粟助邊補集賢小吏調濮州司戶參軍刺史白重進以其年少欲試以事因命讞滯獄玘平決悉中連辟虢成二州從事秦成階三州觀察判官顯德初授郢州刺史歷汝密澤三州建隆中入爲宗正卿乾德初出爲秦州刺史改左監門衛大將軍判三司

弘簡錄

玘狂

躁婞直多忤上旨太祖頗優容之嘗廉得宰相趙普私市秦隴大木事潛以聞上然懼普知因稱足疾求解職五年春罷使守本官自是累獻密疏皆留中不出六年詣闕納所授告命詔勒歸私第又請退居鄆州不許玘不勝忿踰年伺普入

朝馬前揚言其短上聞之召玘及普于便殿面質其事玘大言詆普販木規利上怒促令集百官逐普且諭其事王溥等奏玘誣罔大臣普事得解上詰責玘命武士撻之令御史鞠于殿庭普爲營救得寬其罰黜爲汝州牙校太平興國三年卒年五十八

宋史

司超大名元城人初事邢帥安叔于漢祖在太原超往依之隸帳下爲小校漢祖將渡河遣超先領勁騎由晉絳趨河陽及入汴以超爲鄆州必敵指揮使時京東諸州寇盜充斥以超爲宋宿亳三州遊奕巡檢使改宿州西固鎮守禦都指揮使移屯潁州下蔡鎮屢與淮人戰有功周世宗命宰相李穀討淮南以超爲步軍先鋒副都指揮使又爲廬壽光黃等州巡檢使大敗淮人于盛唐縣獲糧船四十餘艘禽其監軍高

弼果毅指揮使許萬以獻時黃州未下卽命超遙領刺史兼樓櫓戰櫂右廂都校師還改光州刺史敗吳軍千餘于麻城北顯德四年冬與王審琦攻舒州敗吳軍三千先禽刺史施仁望獻于行在卽以超爲舒州團練使宋初命副宋偓領舟師巡撫江徼月餘特詔升舒州爲防禦以超充使太祖討李重進以爲前軍步軍都指揮使及平遣歸治所建隆三年春遷蔡州防禦使乾德六年改絳州防禦使徙晉州兵馬鈐轄是秋又副趙贊爲邠州行營都部署進攻河東及太祖親征爲行營前軍步軍都指揮使改鄭州防禦使開寶七年朝廷將討江左以超久在淮右習知江山險易徙蘄州防禦使行至淮西卒年七十一天禧元年錄其孫文睿爲三班奉職宋史崔彥進大名人有膽略善騎射漢乾祐中隸周祖帳下廣順

初補衛士世宗鎮澶淵令率禁兵以從顯祖初爲控鶴指揮

使後征淮南以功遷散員都虞侯從平瓦橋關改東西班指

揮使領昭州刺史宋初改控鶴右廂指揮使領果州團練使

征李筠爲先鋒部署以功遷常州防禦使從平李重進改虎

捷右廂建隆二年遷侍衛步軍都指揮使領武信軍節度大

舉伐蜀爲鳳州路行營前軍副都部署蜀平坐縱部下略玉

帛子女及諸不法事左遷昭化軍節度觀察留後太祖郊祀

西洛彥進來朝授彰信軍節度太平興國二年移鎮河陽四

年正月遣將征太原分命攻城以彥進與郢州防禦使尹勳

攻其東彰德軍節度李漢瓊冀州刺史牛思進攻其南桂州

觀察使曹翰翰林使杜彥圭攻其西彰信軍節度劉遇光州

刺史史珪攻其北彥進督戰甚急太祖嘉之晉陽平從征幽

州又與內供奉官江守鈞率兵攻城之西北及班師詔彥進與西上閣門副使薛繼興閣門祗候李守斌領兵屯關南以功加檢校太尉是秋契丹侵遂城彥進與劉廷翰崔翰等擊破之斬首萬級五年車駕北巡以彥進爲關南都部署敗契丹于唐興口雍熙三年正月命將北伐分兵三路詔彥進爲幽州道行營馬步軍水陸副都部署與曹彬米信出雄州大軍失利彥進坐違彬節制別道回軍爲敵所敗召還貶右武衛上將軍事具彬傳四年春授保靜軍節度端拱元年被病召歸闕卒年六十七贈侍中彥進頻立戰功然好聚財貨所至無善政沒後諸子爭家財有司攝治太宗召見爲決之謂左右曰此細務朕不宜親臨但以彥進嘗任節制不欲令其子辱于人耳子懷遵至內殿崇班懷清至崇儀副使懷遵子

上賢娶鎮王女崇安縣主懷清子從湜娶岐王女永壽縣主
爲西京左藏庫副使後坐事除名

宋史

潘美字仲詢大名人父璘以軍校戍常山美少倜儻隸府中
典調嘗語其里人王密曰漢代將終兇臣肆虐四海有改卜
之兆大丈夫不以此時立功名取富貴碌碌與萬物共盡可
羞也會周世宗爲開封府尹美以中涓事世宗及卽位補供
奉官高平之戰美以功遷西上閣門副使出監陝州軍改引
進使世宗將用師隴蜀命護永興屯兵經度西事先是太祖
遇美素厚及受禪命美先往見執政諭旨中外陝帥袁彥兇
悍信任羣卜嗜殺黷貨且繕甲兵太祖慮其爲變遣美監軍
美單騎往諭彥遂入朝上喜曰潘美不殺袁彥能令來覲成
我志矣李重進叛太祖親征命石守信爲招討使美爲行營

都監以副之揚州平留爲巡檢以任鎮撫以功授秦州團練使時甫平湖南叛將汪端人心未甯乃授美潭州防禦使嶺南劉鋹數寇桂陽江華美擊走之溪洞蠻獠自唐以來不時侵略頗爲民患美窮其巢穴多所殺獲餘加慰撫夷落遂定乾德二年從兵馬都監丁德裕等率兵克郴州開寶三年征嶺南以美爲行營諸軍都部署郎州團練使尹崇珂副之進克富川鋹遣將率眾萬餘來援大破之遂克賀州十月又下昭桂連三州西江諸州以次降美以功移南面都部署進次韶州韶廣之北門也賊眾十餘萬聚焉美揮兵進乘之韶州遂拔斬獲數萬計鋹窮蹙四年二月遣其臣王珪詣軍門求通好又遣其左僕射蕭淮中書舍人卓惟休奉表乞降美因論以上意言能戰則與之戰不能戰則勸之守不能守則論

之降不能降則死不能死則亡非此五者他不得受乃卽令
殿直冉彥袞送漵等至京師鋠復遣弟保興率眾拒戰美率
厲士卒倍道趨柵頭距廣州百二十里鋠兵十五萬依山谷
堅壁以待美因築壘休士與諸將計曰彼編竹木爲柵若攻
之以火彼必潰亂因以銳師夾擊之萬全策也遂分遣丁夫
數千人持二炬間道造其柵及夜萬炬俱發會天大風火
勢甚熾鋠眾驚擾來犯美揮兵急擊之鋠眾大敗斬數萬計
長驅至廣州鋠盡焚其府庫遂克之擒鋠送京師露布以聞
卽日命美與尹崇珂同知廣州兼市舶使五月拜山南東道
節度五年兼嶺南道轉運使土豪周思瓊聚眾負海爲亂美
討平之嶺表遂安八年議征江南九月遣美與劉遇等率兵
先赴江陵十月命美爲昇州道行營都監與曹彬偕往進次

秦淮時舟楫未具美下令白美受詔提驍果數萬人期於必
勝豈限此一衣帶水而不徑度乎遂麾以涉大軍隨之吳師
大敗及采石磯浮梁成吳人以戰艦二十餘鳴鼓沂流來迎
戰美麾兵奮擊奪其戰艦擒其將鄭賓等七人又破其城南
水砦分舟師守之奏至太祖遣使命亟徙置戰櫂以防他變
美聞詔卽徙軍是夜吳人果來攻砦不能克進薄金陵江南
水陸十萬陳于城下美率兵襲擊大敗之李煜遣徐鉉來乞
緩師上詔諸將促令歸附煜遷延未能決夜遣兵數千持炬
鼓譟來犯我師美率精銳以短兵接戰因與大將曹彬率士
晨夜攻城百道俱進金陵平以功拜宣徽北院使秋命副党
進攻太原戰于汾上破之且多擒獲太平興國初改南院使
三年加開府儀同三司四年命將征太原美爲北路都招討

判太原行府事部分諸將進討并州遂平繼征范陽以美知

幽州行府事及班師命兼三交都部署留屯以捍北邊三交

西北三百里地名固軍其地險阻爲北邊咽喉美潛師襲之

因積粟屯兵以守之自是北邊以甯美嘗巡撫至代州旣秣

馬蓐食俄而遼兵萬騎薄近塞美誓眾銜枚奮擊大破之封

代國公八年改忠武軍節度進封韓國公雍熙三年詔美及

曹彬崔彥進等北伐美獨拔寰朔雲應等州詔內徙其民會

遼兵奄至戰于陳家谷口不利驍將楊業死之美坐削秩三

等責授檢校太傅明年復檢校太師知正定府未幾改都部

署判并州加同平章事數月卒年六十七贈中書令諡武惠

咸平二年配饗太宗廟庭子惟德至宮苑使惟固西上閣門

使惟正西京作坊使惟清崇儀使惟熙娶秦王女平州刺史

惟熙女卽章懷皇后也美後追封鄭王以章懷故也惟吉美
從子累資爲天雄軍駐汴都監雖連戚里能以禮法自節敷
歷中外人咸稱其勤敏云

宋史

曹翰大名人少爲郡小吏好使氣陵人不爲鄉里所譽乾祐
初周太祖鎮鄴與語奇之以隸世宗帳下世宗鎮澶淵署爲
牙校入尹開封留翰在鎮會太祖寢疾翰不俟召歸見世宗
密謂曰主上不豫王爲冢嗣不侍醫藥而決事於外庭失天
下望世宗悟卽入侍以府事屬翰總決及世宗卽位補供奉
官從征高平參豫謀畫尋遷樞密承旨護塞決河世宗征淮
南留鎧甲千數在正陽旣而得降卒八百部送歸京師時翰
適從京師來詣過正陽十數里許追之慮劫兵器爲叛矯殺
之旣見世宗具言其事世宗不悅翰曰賊以困歸我非心服

也所得器甲盡在正陽苟爲所劫是復生一淮南矣因不之
罪從征瓦橋關會班師留知雄州世宗大漸諭范質等以王
著爲相翰爲宣徽使質以著嗜酒翰飾詐而專並寢之改德
州刺史宋初從征澤潞還改濟州刺史乾德二年太祖親征
西蜀移刺均州澗谷深險翰令鑿石通道師旋以濟詔兼西
南諸州轉運使自石門徑趨歸州餉運不乏由夔萬入會王
全斌軍成都以平時全師雄擁眾十萬餘據郫縣叛謀窺成
都翰率兵會劉光毅曹彬等討平之未幾軍校呂翰殺武懷
節據嘉州以叛翰及諸將奪其城諜知賊約三鼓復來攻翰
戒知更使緩向晨猶二鼓賊眾不集而潰因而破之劍南遂
平師還遷蔡州團練使開寶二年從征太原復爲行營都濠
砦使旣班師會河決澶州令翰董其役翰出銀器助役沈所

乘白馬以祭復決陽武再護役皆有成績將征江南命翰率兵先赴荆南改行營先鋒使進克池州金陵平江州軍校胡德牙將宋德明據城拒命翰率兵攻之凡五月而陷屠城無噍類殺兵八百所略金帛以億萬計僞言欲致廬山東林寺鐵羅漢五百頭于京師因調巨艦百艘載所得以歸錄功遷桂州觀察使判潁州太平興國四年從征太原爲攻城南面都部署與崔彥進李漢瓊劉遇三節度分兵攻城翰攻東北劉遇攻西北與劉繼元直城尤險固遇欲與翰易處翰言觀察使班次下當部東北遇堅欲易之數日不決上慮諸將不協遣諭翰曰卿智勇無雙西北面非卿不能當也翰乃奉詔築土山瞰城中數日而就繼元甚恐軍中乏水城西十餘里谷口有娘子廟翰往禱之穿渠得水人馬以給又從征幽州

率所部攻城東南隅卒掘土得蟹以獻翰謂諸將曰蟹水物而陸居失所也且多足彼援將至不可進拔之象況蟹者解也其班師乎已而果驗五年從幸大名拜威塞軍節度仍判潁州復命爲幽州行營都部署詔督役開南河自雄達莫以通漕運議築大隄以捍之翰遣徒數萬伐巨木於漢境遣騎五授五色旗爲斥候前遇邱陵水澤寇賊烟火則各舉其旗以爲應又起烽燧於境上敵疑不敢近塞得巨木數萬以濟用訖事歸鎮翰在郡歲久征歛苛酷上以其有功每優容之會汝陰令孫崇望詣闕訴翰私市兵器所爲多不法詔遣御史滕中正乘傳鞫之獄具當棄市上貸其罪削官爵流錮登州雍熙二年起爲右千牛衛大將軍分司西京四年召入爲左千牛衛上將軍賜錢五百萬白金五千兩淳化三年卒年

六十九贈太尉上命遷其四子守謙守能守節守貴官其六子守護守贄守澄守恩守英守吉皆補殿直翰陰狡多智數好夸誕貪冒貨賂飲酒至數斗不亂每奏事上前雖數十條皆默識不少差嘗作退將詩曰曾因國難披金甲恥爲家貧賣寶刀翰直禁日因語及之上憫其意故有銀錢之賜咸平

元年賜諡武毅

宋史

李繼勳大名元城人周祖領鎮選隸帳下廣順初補禁軍列校累遷至虎捷左廂都指揮使領永州防禦使顯德初遷侍衛步軍都指揮使領昭武軍節度歲餘改領曹州世宗親征淮上令繼勳領兵屯壽州城南造洞屋雲梯攻州城以怠敗績死者數萬梯屋悉被焚召歸闕出爲河陽三城節度議者言罰輕及再幸壽春回左授繼勳右武衛大將軍又以其掌

書記陳南金裨贊無狀并黜之顯德四年冬復從世宗南征

及次迎鑾卽命繼勳帥黑龍船三十艘于江口灘敗吳兵數

百獲戰船二艘以功遷左領軍衛上將軍七月改右羽林統

軍六年春世宗幸滄州以繼勳爲戰權左廂都部署前澤州

刺史劉洪副之俄權知邢州恭帝卽位授安國軍節度加檢

校太傅宋初加檢校太尉太祖平澤潞繼勳朝于行在卽以

爲昭義軍節度是秋率師入河東燔平遙縣俘獲甚眾建隆

二年冬又敗并軍千餘人斬首百餘級獲其遼州刺史傅延

彥及弟延勳來獻乾德二年詔與康延沼尹訓率步騎萬餘

攻遼州太原將郝貴超領兵來援戰于城下繼勳大敗之州

將杜延韜危蹙與拱衛都指揮使冀進兵馬都監供奉官侯

美籍部下兵三千送款于繼勳卽遣內供奉官都知慕容延

忠入奏詔褒之未幾并人誘契丹步騎六萬人來取遼州復遣繼勳與羅彥瓌郭進曹彬等領六萬眾赴之大破契丹及太原軍於城下五年加同平章事開寶初將征河東以繼勳爲行營前軍都部署敗并人於渦河二年太祖親征河東命繼勳爲行營前軍都部署駕至城下分軍四面繼勳柵其南三年春移鎮大名太平興國初加兼侍中俄以疾求歸洛陽許之賜錢千萬白金萬兩是秋上表乞骸骨拜太子太師致仕朝會許綴中書門下班尋卒年六十二贈中書令繼勳累厯藩鎮所至無善政然以質直稱信奉釋氏與太祖有舊故特承寵遇弟繼偓亦有武勇周顯德末補內殿直叅初累厯軍職開寶中爲步軍副都軍頭太平興國三年遷內外馬步軍副都軍頭坐事改右衛率府率六年加本衛將軍領獎州

刺史累遷龍衛右廂都指揮使領本州團練使繼勳子守恩
至如京使守元至北作坊使守徽爲崇儀副使宋史

馮繼業字嗣宗大名人父暉朔方節度封衛王五代史有傳

繼業幼敏慧有度量以父任補朔方軍節院使牙內都虞候

周廣順初暉疾繼業圖殺其兄繼勳暉卒遂代其父爲朔方

軍留後遷節度使東都事略兼靈環觀察處置度支温池榷稅等

使建隆初來朝獻駝馬寶器開寶二年賜詔獎諭拜靜難軍

節度使三年改鎮定國軍吏民立碑頌其遺愛太平興國初

來朝封梁國公留京師明年卒年五十一贈侍中宋史

趙延進澶州頓邱人父暉周太子太師漢末時暉領鳳翔節

度未赴鎮王景崇據城反命暉爲都招討使延進年十八屬

當軍鋒景崇平延進奉捷奏以入授鳳翔牙內指揮使領貴

州刺史暉徙宋州亦從爲牙職改領榮州刺史睢陽有盜數百爲民患延進以父命領牙兵千餘悉擒戮之詔書褒美丁外艱表求持服旣終喪周世宗征淮南延進獻萬縑以助軍仍請對世宗召見之時延進有從兄爲虎捷都虞候帳前橫衝指揮使世宗指延進語之曰爾弟拳勇有謀將授以禁軍大校延進自陳好讀書不願也翌日授右千牛衛將軍濠州兵馬鈐轄從征瓦橋關爲隨駕金吾街仗使宋初遷右羽林軍將軍濠州都監會伐蜀以襄州當川路津要命爲鈐轄同知州務蜀平專領郡事漢江水歲壞隄害民田常興工修護延進累石爲岸遂絕其患入爲兩浙漳泉國信使開寶二年授右龍武將軍知靈州以母老願留得權判右金吾街仗使厯知河中府梓相青三州太平興國中大軍平并州討幽薊

皆爲攻城入作濠若使嘗詔督造礮八百期以半月延進入日成太宗親試之大悅又令主城北諸洞子及班師命與孟元喆藥可瓊留屯定州遼人擾邊命延進與崔翰李繼隆將兵入萬禦之賜入陣圖命如所圖以行師師次蒲城遼騎至翰等方按圖布陣陣去各百步士眾疑懼無鬪志延進謂翰等曰主上委吾等以邊事期克敵耳今敵眾若此而我師星布其勢懸絕將何以濟不如合而擊之可以決勝違令而獲利不猶愈辱國乎翰等曰萬一不捷則若之何延進曰倘有喪敗則延進獨當其責於是改爲二陣前後相副士眾皆喜三戰大破之獲人馬牛羊鎧甲數十萬以功遷右監門衛大將軍知鎮州及代吏民數千守關借留詔許留一年俄改右領軍衛大將軍出爲高陽關平戎軍都監兼緣邊巡檢改

鈐轄知揚州詔入授右屯衛大將軍徙知相州遷右驍衛大將軍改知鄧州淳化初飛蝗不入境詔褒之還判右金吾街仗事至道二年拜右金吾衛大將軍咸平二年卒年七十三贈右武衛上將軍延進姿狀秀整涉獵經史好作詩士以此多之延進妻卽淑德皇后之妹也子昂太平興國二年登進士第至戶部郎中直昭文館

宋史

尹崇珂秦州天水人後徙居大名父延勛歷磁同滌三州刺史崇珂初事周世宗於藩邸以謹厚稱及卽位補東西班都知從戰高平有勞績遷本班副點檢從征淮南遷都虞侯轉都指揮使改殿前都指揮使宋初出爲淄州刺史有善政民詣闕請刻石頌德太祖命殿中侍御史李穆撰文賜之討湖南爲行營前軍馬軍都指揮使荆湘平授朗州團練使又與

潘美丁德裕克郴州乾德中征嶺表以崇珂爲行營馬步軍副部署克廣州擒劉鋹卽日詔與潘美同知廣州兼市舶轉運等使錄功遷保信軍節度未幾南漢開府樂範容州都指揮使鄧存忠韶州賊帥周思瓊春恩道都指揮使麥漢瓊等據五州之地以叛崇珂討之太祖遣中使李神祐督戰數月盡平其黨還治所六年卒年四十二贈侍中遣中使護喪歸葬洛陽以其子昭吉弟崇珪爲西京作坊使昭吉領會州刺史崇珪領歙州刺史初太宗在周朝娶崇珂妹追諡淑德皇后昭吉至洛苑使次子昭輯至供奉官閭門祇候

宋史

冀州

荆罕儒冀州信都人父基王屋令罕儒少嘗爲盜晉天福中詣范陽委質燕王趙延壽得掌親兵開運末延壽從契丹主

德光入汴署罕儒密州刺史漢初改山南東道行軍司馬周
廣順初爲率府率奉朝請貧不能振顯德初世宗戰高平以
通事舍人李延傑薦召赴行在命爲招收都指揮使會征太
原命罕儒率步卒三千先入敵境罕儒令人負束芻徑趨太
原城焚其東門擢控鶴弩手大劍直都指揮使從平淮南領
光州刺史改秦州爲下蔡守禦都指揮使兼舒蘄二州招安
巡檢使四年秦州初下眞拜刺史兼海陵鹽城兩監屯田使
明年三月世宗幸秦州以罕儒爲團練使賜金帶銀器鞍馬
六年春軍吏耆艾詣闕請留恭帝詔褒之建隆初升鄭州防
禦以罕儒爲使改晉州兵馬鈐轄罕儒恃勇輕敵嘗率騎深
入晉境人多閉壁不出虜獲甚眾是年冬復領千餘騎抵汾
州城下焚其草市退次京土原劉鈞遣郝貴超領萬餘眾襲

罕儒黎明及之罕儒遺都監氈毯副使閻彥進分兵以禦貴
超罕儒錦袍裹甲據胡牀享士方割羊臂膳以啖閻彥進小
卻卽上馬麾兵徑犯賊鋒并人攢戈舂之罕儒猶格鬪手殺
十數人遂遇害劉鈞素畏罕儒之勇常欲生致及聞其死求
殺罕儒者戮之太祖痛惜不已擢其子守勳爲西京武德副
使因索京土原之不效命者黜慈州團練使王繼勳爲率府
率閻彥進爲馭直斬其部下龍捷指揮使石進德等二十九
人罕儒輕財好施在秦州有煮海之利歲入鉅萬詔聽十收
其八用猶不足家財入有籍出不問其數有供奉官張奉珪
使秦州自言後唐張承業之子罕儒曰我生平聞張特進名
幸而識其子乃遺錢五十萬米千斛罕儒雖不知書好禮接
儒士進士趙保雍登科覆落客遊海陵罕儒問其所欲保雍

以將歸京師且言緣江權務以絲易茗有厚利罕儒立名主
藏奴合籍藏中絲得四千餘兩盡以與之然好勇善戰不顧
勝負常欲削平太原志未果而及于敗人皆惜之

宋史

范廷召冀州棗強人父鐸爲里中惡少年所害廷召年十八
手刃父讎剖取其心以祭父墓弱冠身長七尺餘有膂力嘗
爲盜以勇壯聞周廣順初應募爲北面招收指揮使世宗卽
位入補衛士從征高平遷殿前指揮使從征淮南流矢中左
股宋初從平李筠李重進轉本班都知又從征太原再轉散
都頭都虞候領費州刺史太平興國中以日騎軍都指揮使
從平太原征范陽秦王廷美嘗遣親吏閻懷忠趙瓊犒禁軍
列校廷召預焉坐出爲唐州馬步軍都指揮使雍熙三年議
北征召入爲馬步軍都軍頭領平州刺史幽州道前軍先鋒

都指揮使與賊遇固安南破其眾三千斬首千餘級克固安
新城二縣乘勝下涿州廷召復與賊戰中流矢血漬甲縷神
召自若督戰益急詔褻之師還遷日騎右廂都指揮使領本
州團練使又遷左廂移領高州端拱初出爲齊州防禦使數
月授捧日天武四廂都指揮使領澄州防禦使二年轉殿前
都虞候領涼州觀察使鎮州副都部署大破契丹三萬眾於
徐河斬首數千級淳化二年爲平虜橋砦都部署歷并代環
慶兩路副部署至道中遣將從五路討李繼遷命廷召副李
繼隆爲環慶靈都部署廷召出延州與賊遇獲米募軍主吃
囉等兵器鎧甲數萬是役也諸將失期獨廷召與王超大小
數十戰屢克捷上嘉之俄又爲并代兩路都部署三年遷侍
衛馬軍都指揮使領河西軍節度爲定州行營都部署咸平

二年契丹入塞車駕北巡廷召與戰瀛州西斬首二萬級逐北至莫州東三十里又斬首萬餘奪其所掠老幼數萬口契丹遁去師還錄功加檢校太傅益賦邑又改殿前都指揮使四年正月被疾車駕臨問卒年七十五贈侍中廷召在軍四十餘年由顯德以來凡親征未嘗不從善騎射嘗出獵有羣鳥飛過廷召發矢並貫其三觀者駭異性惡飛禽所至處彈射殆絕尤不喜驢鳴聞必擊殺之子守均至散員都虞候演州刺史守信內殿承制閣門祇候守宣內殿崇班守慶更名珪後爲西京作坊副使淮南江浙荆湖制置發運副使

宋史

張廷翰冀州信都人父慎圖仕周爲兵部郎中廷翰少慷慨有智略善騎射晉天福中冀州刺史張建武召補牙校其後刺史李冲署爲本州牢城軍校契丹入中原署其黨何通爲

刺史契丹主道殂州人共殺何通推廷翰知州事漢初就拜
刺史廷翰盡捕殺何通者戮于市爲政寬厚簡易民甚愛之
周廣順初召赴闕周祖偉其貌仍遣還在郡八年契丹將高
牟翰數擾邊皆擊走之廷翰家富於財歲遣人齎金帛北入
市善馬常得數百匹貢獻外悉遺貴近甚獲美譽顯德中厯
棣海沂三州團練使屢率兵敗淮人移萊州宋初又厯冀亳
二州乾德二年卒年四十七

宋史

趙州

馬韶趙州平棘人習天文三式開寶中太宗以晉王爲開封
尹禁私習天文太宗親吏程德元與韶善以禁故不與韶往
來九年冬十月十九日旣夕韶忽造德元言明日乃晉王利
見之辰韶故以相告德元惶遽入白太宗太宗命以人防守

之將聞于太祖及詰旦太宗果受遺踐昨踰月擢韶爲司天
監主簿太平興國二年遷太僕寺丞改祕書省著作郎歷太
子中允祕書丞出爲平恩令召還復舊官判司天監事就遷
太常博士淳化五年坐事謫博興令移長山秩滿歸鄉里卒

於家

宋史

深州

程羽字冲遠深州陸澤人少好學能屬文登晉天福進士授
陽穀主簿歷虞鄉醴泉新都令皆有政績開寶中選爲兩使
判官入對稱旨擢著作郎出知興州踰年改知興元府

弘簡錄

八年詔歸闕以本官領開封府判官太宗卽位拜給事中知
開封府未幾出知成都府爲政寬簡蜀人便之入朝拜禮部
侍郎上欲優以清職以爲文明殿學士位在樞密副使下營

第泰甯坊以賜之太平興國五年典試貢士稱得人六年以

老疾求解職拜兵部侍郎未幾致仕仍給全俸雍熙元年卒

年七十二贈禮部尙書

宋史

子希振以廕至虞部員外郎

弘治錄

大中祥符元年卒其子適賜同學究出身從孫琳別有傳

宋史

李昉字明遠深州饒陽人以廕補齋郎選授太子校書漢乾

祐間舉進士爲祕書郎以宰相馮道薦直宏文館改右拾遺

集賢殿修撰周顯德二年宰相李穀征淮南昉爲記室師還

爲主客員外郎知制誥集賢殿直學士四年加史館修撰判

館事是年冬世宗南征從至高郵乃命爲屯田郎中翰林學

士六年春丁內艱恭帝嗣位賜金紫宋初加中書舍人建隆

三年罷爲給事中四年平湖湘受詔祀南嶽就命知衡州踰

年代歸陶穀誣奏昉爲所親求京畿令上怒召吏部尙書張

昭面質昭免冠抗聲言穀罔上上疑不釋出昉爲彰武軍行
軍司馬開寶二年召還拜中書舍人未幾知學士院三年知
貢舉五年復知貢舉秋預宴大明殿上見昉坐盧多遜下問
故宰相言多遜學士昉直殿耳卽令眞拜學士令居多遜上
宋坐取士失當左遷太常少卿明年復拜中書舍人翰林學
士盧多遜之毀趙普也太祖以問昉言臣書之外他無所知

太祖默然

東都事略

太宗卽位加昉戶部侍郎受詔與扈蒙李穆

郭贄宋白同修太祖實錄從征太原車駕次常山常山卽昉
之故里賜羊酒俾召公侯宴飲盡歡里中父老及嘗與遊從
者咸預焉七日而罷人以爲榮師還以勞拜工部尙書兼承
旨太平興國中改文明殿學士遂參知政事尋拜平章事監
修國史宋史加中書侍郎太宗嘗顧輔臣問朕與唐太宗孰優

皆言陛下乃堯舜何止太宗昉獨無言徐誦白居易怨女三千放出宮死囚四百來歸獄之詩太宗拱手曰朕不及也昉請復時政記先進御後付史館遂爲故事

東都事略

雍熙元年郊

祀命昉爲僕射昉固辭乃加中書侍郎王師討幽薊不利遣使分詣河南東籍民爲兵凡八丁取一昉奏請續遣使臣嚴加戒飭人情若有不安卽須少緩密奏取裁庶免後患上嘉納之端拱初布衣翟馬周擊登聞鼓訟昉不思備邊徒知賦詩宴樂罷爲右僕射詔文武羣臣各進策備禦昉又引漢唐故事深以屈己修好弭兵息民爲言時論稱之淳化二年復以本官兼中書侍郎平章事監修國史三年夏旱蝗旣雨昉以變理非材上表待罪不許四年以其家多故求解機務詔遣齊賢等諭旨復起視事後數月罷爲右僕射奢侍中崧者

與昉同宗且同里時人謂崧爲東李家昉爲西李家漢末崧
被誅至是其子璨自蘇州常熟縣令赴調昉爲訟其父冤日
言周太祖已爲昭雪贈官還其田宅錄璨而官之然璨年幾
五十尙淹州縣之職儻推一視之仁澤及衰微之祚則已往
之冤獲伸於下而繼絕之恩永光簡冊矣詔授璨著作佐郎
後官至右贊善大夫明年昉年七十以特進司空致仕朝會
宴饗令綴宰相班歲時賜子益加厚焉至道元年正月望上
觀燈乾元樓召昉賜坐於側酌御樽飲之自取果餌以賜因
顧侍臣曰李昉事朕兩人中書未嘗有傷人害物之事可謂
善人君子矣二年陪祀南郊禮畢入賀因拜舞仆地臺史掖
之以出卧疾數日薨年七十二贈司徒諡文正昉和厚多恕
不念舊惡在位小心循謹無赫赫稱爲文章慕白居易尤淺

近易曉好接賓客江南平士大夫歸朝者多從之遊雅厚張
洎而薄張必及昉罷相洎草制深攻詆之而必朔望必詣昉
或謂必曰李公待君素不厚何數詣之必曰我爲廷尉日李
公方秉政未嘗一有請求此吾所以重之也昉素與盧多遜
善而多遜屢譖之或以告昉不信及入相太宗言及多遜事
昉頗爲解釋帝曰多遜居常毀卿一錢不直昉始信之上由
此益重昉昉居中書日有求進用者雖知其材可取必正色
拒絕之已而擢用或不足用必溫語慰之子弟問故曰用賢
人主之事若受其請是市私恩也故峻絕之使恩歸於上若
不用者旣失所望又無善辭取怨之道也有文集五十卷子
四人宗訥宗誨宗諤宗諤宗誨右贊善大夫宗諤主賓客員

外郎

宋史

畿輔通志卷二百九十四

雜傳八 遼 金

遼

順天府

韓延徽

耶律儼

永平府

趙思溫

正定府

趙延壽 子贊

廣平府

張礪

口北三廳

長補直示 雜傳八

耶律達魯

遵化州

韓匡嗣

子德源

冀州

王白

金

順天府

韓昉

程案

任熊祥

韓企先

左企弓

子泌

淵

趙元

劉彥宗

子萼

筈

康公弼

馬諷

張斛

翟永固

高士談

李伯淵

孫卽康

宋珪

潘守恆

保定府

時立愛

李成

承德府

盧彥倫

田灝

毛子廉

永平府

孟浩

齊陶

張介

河間府

劉完素

正定府

蔡松年

廣平府

張煒

李慶嗣

大名府

蘇椿

宣化府

李師夔

遵化州

李瞻

易州

張通古

張元素

遼

順天府

韓延徽字藏明幽州安次人父夢殷累官薊儒順三州刺史

延徽少英敏燕帥劉仁恭奇之召爲幽都府文學平州錄事

參軍授幽州觀察度支使後守光為帥延徽來聘謹案契丹國志延徽

仕劉守光為幕府參軍守光與六鎮構怨自稱燕帝延徽諫之不從守光置斧鑕於庭曰有敢諫者斬孫鶴力諫守光殺

之延徽以幕府之舊且素重之得全守光末年衰困盧龍太巡屬皆入於晉遣延徽求援於契丹事較詳附錄於此

祖怒其不屈遼史留之使牧馬契丹國志舒嚕原作述律后諫曰彼秉節

弗撓賢者也奈何困辱之太祖召與語合帝意立命參軍事

攻黨項室韋服諸部落延徽之籌居多乃請樹城郭分市里

以居漢人之降者又為定配偶教墾藝以生養之以故逃亡

者少居久之慨然懷其鄉里賦詩見志遂亡歸唐已而與他

將王緘謹案遼史考證云契丹國志及通鑑俱作幕府掌書記王緘有隙懼及難遼史求東

歸省過真定止於鄉人王德明家問所適曰今河北皆為晉

有吾將復走契丹德明曰叛而復往得無取死乎契丹國志延徽

笑曰彼失我如失左右手其見我必喜遼史既省母復入契丹

契丹國志太祖問故延徽對曰忘親非孝棄君非忠臣雖挺身逃

臣心在陛下臣是以復來帝大悅賜名匣列謹案遼史改作實喇續通志作

伊呼考證云匣列係遼國語仍舊遼言復來也命為守政事令崇文館大學

士中外事悉令參決天贊四年從征渤海大誣誤乞降既而

復叛與諸將破其城以功拜左僕射又與康默記攻長嶺府

拔之師還太祖崩哀動左右太宗朝封魯國公仍為政事令

使晉還改南京三司使世宗朝遷南府宰相建政事省設張

理具稱盡力吏天祿三年本紀作五年六月河東使請行册禮帝

召延徽定其制延徽奏一遵太祖册晉帝禮從之應歷中致

仕子德樞鎮東平詔許每歲東歸省九年卒年七十八贈尚

書令葬幽州之魯郭世為崇文令公初延徽南奔太祖夢晉

鶴自帳中出比還復入帳中詰旦謂侍臣曰延徽至矣已而

果然太祖初元庶事草創凡營都邑建宮殿正君臣定名分

法度井井延徽力也為佐命功臣之一

遼史 謹案契丹國志契丹稱帝以延徽

為相累遷至中書令晉王遣使契丹延徽寓書於晉王敘所以北去之意且曰非不戀英主非不思故鄉所以不留正懼王緘之讒耳因以老母為託且曰延徽在此契丹必不南牧故終同光之世契丹不深入延徽之力也本傳不載謹誌於後

耶律儼字若思析津人本姓李氏父仲禧重熙中始仕清甯

初同知南院宣徽使事四年城鴨子混同一水間拜北院宣

徽使咸雍初坐誤奏事出為榆州刺史俄詔復舊職遷漢人

行宮都部署七年

謹案原文作六年據道宗紀改

賜國姓封韓國公九年改

南院樞密使時樞臣伊遜

原作乙辛

等誣陷皇太子詔仲禧偕伊

遜鞠之蔓引無辜未嘗雪正伊遜遂力薦仲禧可任拜廣德

軍節度使復為南院樞密使卒諡欽惠儼儀觀秀整好學有

詩名登咸雍進士第守著作佐郎補中書省令史以勤敏稱

大康初歷都部署判官將作少監後兩府奏事論羣臣優劣

唯稱儼才俊改少府少監知大理正賜紫六年遷大理少卿

奏讞詳平明年升大理卿丁父憂奪服同僉都署司事大安

初爲景州刺史繩胥徒禁豪猾撫老恤貧未數月善政流播

郡人刻石頌德二年改御史中丞詔案上京滯獄多所平反

同知宣徽院事提點大理寺六年改山西路都轉運使刮剔

垢弊奏定課額益州縣俸給事皆施行壽隆初授樞密直學

士謹案道宗紀儼在大安時已授此職以母憂去官尋召復舊職宋攻夏李乾

順遣使求和帝命儼如宋平之拜參知政事六年駕幸鴛鴦

灤召至內殿訪以政事帝晚年倦勤用人不能自擇令各擲

骰子以采勝者官之儼嘗得勝采帝曰上相之徵也遣知樞

密院事賜經邦佐運功臣拜越國公修皇朝寶錄

謹案續通志云天祚

紀乾統三年召儼纂太祖諸帝實錄與本傳異

七十卷帝大漸儼與北院樞密使阿

蘇原作阿思

同受顧命乾統三年徙封秦國六年封漆水郡王天

慶中以疾命乘小車入朝疾甚遣太醫視之卒贈尚父諡曰

忠懿儼素廉潔一介不取於人經籍一覽成誦又善伺人主

意妻邢氏有美色嘗出入禁中儼教之曰勿失上意由是權

寵益固三子處貞太常少卿處兼

宏簡錄作處廉

同知中京留守事

處能少府少監

遼史

謹案契丹國志李儼少而狡桀倜儻不羣軒然夷倨才濟其姦與蕭奉先雅相厚

善初為內侍省給事累遷至中書供奉積官至南面宰相封漆水郡王儼資滑性巧善諛佞在天祚朝秉國樞柄凡十五

年女真連年之難儼與奉先蒙蔽為欺以至於亡天祚不悟也儼嘗與知樞密事牛温有隙各進所親厚朋黨紛然恃奉

先為內主温不能勝及儼死奉先又薦其姪處温為相竟至亡國與本傳所載略殊謹誌於後

永平府

趙思溫字文美盧龍人少果銳膂力兼人隸燕帥劉仁恭幕

李存勖得罪於燕思溫統偏師拒之流矢中目裂裳漬血戰

奮不已為存勖周德威所擒存勖壯而釋其縛日見信用真

築戰於莘縣以驍勇聞授平州刺史兼平營薊三州都指揮

使神冊二年太祖遣將略燕地思溫來降及伐渤海以思溫

為漢軍都團練使力戰拔扶餘城身被數創帝親為調藥謹案

契丹國志太祖崩述律后左右有桀黠者輒語曰為我達語

於先帝至墓所則殺之前後所殺者以百數最後趙思溫當

往不肯行后曰汝事先帝親近何故不行對曰親近莫如后

后行則繼之后曰吾非不欲從先帝於地下願嗣子幼弱國

家無主不得往耳乃斷其一太宗即位以功擢檢校太保保

靜軍節度使天顯十一年唐兵攻太原石敬瑭遣使求救帝

命思溫自嵐憲間出兵援之既罷兵改南京留守盧龍軍節

度使管内觀察處置等使開府儀同三司兼侍中賜協謀靜

亂翊聖功臣尋改臨海軍節度使會同初從耶律德呼原作牒

使晉行册禮還加檢校太師二年有星隕於庭卒贈太師魏

國公子延昭通鑑作延照晉祁州刺史據通鑑增延靖官至使相遼史

正定府

趙延壽本姓劉恆山人父邠令椿梁開平初滄州節度使劉

守文陷椿其裨將趙德鈞獲延壽養為子少美容貌好書史

唐明宗先以女妻之及即位封其女為興平公主拜延壽駙

馬都尉樞密使明宗子從榮恃權跋扈內外莫不震懾延壽

求補外避之出為宣武軍節度使清泰初加魯國公復為樞

密使鎮許州石敬瑭發兵太原唐遣張敬達往討會敬達敗

保晉安寨延壽從德鈞往救屯團柏谷口按兵不戰德鈞累

表為延壽求威德軍節度使不從延壽乃詐云德鈞遣使致

書北國為唐結好說令引兵歸國實別為密書厚以金帛賂

太宗云若立己為帝請約為兄弟之國即以兵南平洛陽時

太宗以己許晉卻之及晉安已破兵至圍柏谷德鈞父子先

遁太宗追及延壽與父俱降

謹案續通志云趙延壽冀圖自立其外降謀篡情事通鑑及契

丹國志記載甚詳本傳失載今據二書參輯

明年德鈞卒以延壽為幽州節度使

封燕王

謹案宏簡錄太宗紀延壽貂蟬冠不肯服別為燕王冠以自表異

及改幽州為南京

遷留守總山南事天顯末以延壽妻在晉詔取之以歸自是

益自激昂圖報會同初帝幸其第加政事令

遼史晉人之背盟

也延壽覬代晉屢說太宗擊之太宗曰得之當立汝為帝

續通

志 太宗親征延壽為先鋒下貝州授魏博等州節度使封魏

王

謹案續通志云遼太宗本紀載下貝州事在會同七年延壽為魏博節度使亦在是時契丹國志又作八年事與此

互敗晉軍於南樂獲其將賽項羽軍元城晉將李守貞高行

周率兵逆戰又破之至頓邱會大霖雨帝欲班師延壽諫曰
晉軍屯河濱不敢出戰若徑入澶州奪其橋則晉不足平帝
然之適晉軍先歸澶州高行周至析城延壽將輕兵逆戰帝
親督騎士突其陣敵遂潰師還留延壽徇貝冀深三州八年
再伐晉晉主遣延壽族人趙行實以書來招時晉人堅壁不
出延壽給曰我陷遼久甯忘父母之邦若以軍迎我卽歸晉
人以爲然遣杜重威率兵迎之延壽至滹沱河據中渡橋與
晉軍力戰手殺其將王靖兩軍相拒太宗潛由他渡濟留延
壽與耶律頌格原作朔古續
通志作雙寬據橋敵不能奪屢敗之杜重威
率厥衆降帝喜賜延壽龍鳳赭袍且曰漢兵皆爾所有宜親
往撫慰延壽至營杜重威李守貞迎謁馬首後太宗克汴延
壽因李崧求爲皇太子帝曰吾於魏王雖割肌肉亦不惜但

皇太子須天子之子得爲魏王豈得爲也詔遷延壽秩翰林

學士承旨張礪進擬中京留守大丞相錄尙書事都督中外

諸軍事帝塗錄尙書事都督中外諸軍事選會同十一年即

年延壽進言於太宗陳橋降卒得免死者二三十萬人先

是晉軍降契丹帝悉收其鎧仗數百萬貯恆州驅馬數萬歸

其國遣杜重威將其衆從己而南及河帝以晉兵之衆恐其

爲變欲悉以遼騎擁而納之河流或諫曰晉兵在他所者尙

多彼聞降者盡死必皆拒命爲患不若且撫之徐思其策帝

乃使重威以其衆屯陳橋會久雪官無給士卒凍餒咸怨重

威相聚而泣重威每出道旁人皆罵之帝猶欲誅晉兵延壽

言於帝曰皇帝親冒矢石以取晉國欲自有之乎將爲它人

取乎帝變色曰朕舉國南征五年不解甲僅能得之豈爲它

人乎延壽曰晉國南有唐西有蜀常爲仇敵皇帝亦知之乎
日知之延壽曰晉國自浙密西及秦鳳延袤數千里邊於吳
蜀常以兵戍之南方暑濕上國之人不能居也它日車駕北
歸以晉國如此之大無兵守之吳蜀必相與乘虛入寇如此
豈非爲它人取之乎帝曰朕不知也然則奈何延壽曰陳橋
降卒可分以守南邊則吳蜀不能爲患矣帝曰朕昔在上黨
失於斷割悉以唐兵援晉旣而反爲仇讎北向與吾戰辛勤
累年僅能勝之今幸入吾手不因此時悉除之豈可復留以
爲後患乎延壽曰嚮留晉兵於河南不質其妻子故有此憂
今若悉徙其家於恆定雲朔之間每歲分番使戍南邊何憂
其爲變哉此上策也帝曰善惟大王所以處之由是陳橋兵
始得免分遣還營太宗崩延壽恨帝負約謂人曰我不復八

龍沙矣因僞稱受太宗遺詔權知南朝軍國事世宗錮之

謹案

逸史本傳云世宗卽位以翌載功授樞密使與契丹志殊後三年卒

契丹國志

子贊字元輔幼

聰慧應神童舉明宗時賜童子及第延壽出鎮宣武軍

奏者

牙內都校及延壽降契丹贊獨與母公主留西洛契丹來取

晉祖命贊奉母歸薊門契丹既滅晉以贊爲河中節度使延

壽從契丹北歸贊得留鎮漢祖起晉陽贊奉表勸進加檢校

太尉鎮河中改京兆尹徙鎮晉昌贊懼漢疑已潛遣親吏趙

仙奉表歸蜀判官李恕者本延壽賓佐深所委賴贊出鎮從

爲上介至是語贊曰漢方建國必務懷柔公若泥首歸朝必

保富貴狼狽入蜀理難萬全儻復不容後悔無及公能聽納

請入朝爲公申理贊卽遣恕詣闕漢祖見恕問贊何以附蜀

恕曰贊家在燕薊身受契丹之命自懷憂恐謂陛下終不能

容招引西軍蓋圖苟免臣意國家甫定務安亡民所以令臣
乞哀求覲漢祖曰贊之父子亦吾人也事契丹出於不幸今
聞延壽落於陷穽吾忍不容贊耶恕未還贊已離鎮入朝授
左衛上將軍周太祖卽位爲左右羽林左龍武三統軍世宗
南征初遣贊率師巡警壽州城外俄命爲淮南道行營左廂
排陣使世宗歸京師留贊與諸將分兵圍壽春贊獨當東面
諸將戰多不利贊獨持重未嘗挫衄又獨以所部襲破吳驍
將魯公綰軍世宗再征壽春命造橋渦口以通濠泗濠人謀
焚其橋贊覘知設伏橋下強弩亂發殺獲甚衆世宗移兵趨
濠贊親攻城矢集於甲猶力戰遂拔其羊馬城又以所部兵
巡撫滁和間破吳人於石潭橋淮南平以功授保信軍節度
使恭帝卽位加開府贈宋初加檢校太師累鎮忠正軍建雄

軍為邠州路部署開寶二年太祖將討晉陽又以為河東道
行營前軍馬步軍都虞候車駕薄城下贊扼其西偏并人乘
晦日突門潛犯贊壘贊率眾擊退之矢貫足太祖勞問數四

賜良藥傅之四年改鎮鄜州太宗即位封衛國公太平興國

二年卒贈侍中

續通志

謹案趙贊為延壽子延壽終於遼
贊終於宋兩史各自列傳故臨文多異辭延

壽以唐外戚官樞密身事二主贊歷事五姓父既包藏禍心
子實不能幹蠱今依史例附入延壽傳後蓋迹雖異而其為
貳則一也

廣平府

張礪磁州滏陽人

契丹國志

初仕唐為掌書記遷翰林學士會石

敬塘起兵唐主以礪為招討判官從趙德鈞援張敬達於河

東及敬達敗礪入契丹太宗見礪剛直有文彩擢翰林學士

礪臨事必盡言無所避帝益重之未幾謀亡歸為追騎所獲

帝責之礪對曰臣不習北方土俗飲食居處意常鬱鬱以是

亡耳帝顧通事高彥英曰朕嘗戒汝善遇此人何乃使失所

而亡礪去可再得耶遂杖彥英而謝礪會同初升翰林承旨

兼吏部尙書從帝伐晉入汴諸將蕭翰耶律郎五續通志滿作朗鄂

達原作麻答輩肆殺掠礪奏曰今大遼始得中國宜以中國人治

之不可專用國人及左右近習苟政令乖失則人心不服雖

得之亦將失之帝不聽改右僕射兼門下侍郎同中書門下

平章事遼史謹案續通志云百官志門下侍郎隸門下省同中書門下平章事隸中書省係礪兼官原文作門

下侍郎平章事者誤也謹依五代史改正帝在汴將視朝有司給礪三品冠服礪

曰吾在上國時晉奉冊北朝賚二貂冠其一宰相韓延徽冠

之其一命我服之今豈可降服也卒冠貂蟬以朝五代史車駕

北還至欒城崩時礪卧病恆州蕭翰與滿達原作麻答以兵圍其

第數之曰汝何故於先帝言國人不可為節度使我以國舅

之親有征伐功先帝留我守汴以為宣武節度使汝獨以為

不可又譖我與嘉哩原作解里好掠人財物子女今必殺汝趣令

鎖之礪抗聲曰此國家大體安危所係吾實言之欲殺即殺

奚以鎖為滿達原作麻答以礪大臣不可專殺乃救止之是夕礪

恚憤卒遼史

口北三廳

耶律達魯原作敵魯字繖布斡其先本五院之族始置宮分隸焉

達魯精於醫察形色即知病原雖不診候有十全功統和初

為韓德讓所薦官至節度使初樞密使耶律色珍原作斜軫妻有

沉疴易數醫不能治達魯視之曰心有蓄熱非藥石所及當

以意療因其贖聒之使狂用泄其毒則可於是令大擊鉦鼓

於前翌日果狂呌呼怒罵力極而止遂愈治法多此類人莫

能測年八十卒

遼史 謹案遼史蕭呼都克傳載其曾祖達魯明醫以附韓德讓得世預太醫選於本傳

事迹相近疑是一人為蕭為耶律必有一誤

遵化州

韓匡嗣薊州玉田人中書令知古之子以善醫直長樂宮皇

后視之猶子應歷十年為太祖廟詳袞

原作詳穩

後宋王喜隱謀

叛辭引匡嗣帝置不問景宗在藩邸善匡嗣即位拜上京留

守頃之王燕改南京留守保甯末以留守攝樞密使時耶律

和克

原作虎古

使宋還言宋人必取河東可先事為備匡嗣阻之

已而宋人果取太原乘勝逼燕匡嗣與南府宰相沙哩特袞

原作惕隱

休格

原作休哥

侵宋軍於滿城方陣宋人請降匡嗣欲納之

休格曰彼軍氣甚銳疑誘我也可整頓士卒以禦匡嗣不聽

卷一百一十一 雜傳八

俄宋軍鼓譟薄我衆蹙踐塵起漲天匡嗣倉卒諭諸將無當

其鋒衆既奔遇伏兵扼要路匡嗣棄旗鼓遁其衆走易州山

獨休格收所棄兵械全軍遣帝怒匡嗣數之曰爾違衆謀深

入敵境爾罪一也號令不肅行伍不整爾罪二也奪我師旅

挺身鼠竄爾罪三也偵候失機守禦弗備爾罪四也捐棄旗

鼓損威辱國爾罪五也促令誅之皇后引諸內戚徐爲解帝

重違其請良久威稍霽乃杖而免之既而遙授晉昌軍節度

使乾亨二年改西南面招討使謹案遼史考證云景宗紀乾亨元年匡嗣降封秦王傳未

載其改西南面招討使紀載在三年卒睿知皇后聞之遣使臨弔賻贈甚厚後

追贈尙書令五子德源德讓後賜名隆德威德崇德疑德讓

德威德疑俱有傳德源性愚而貪初侍景宗邸及卽位列選

侍保甯間謹案續通志云保甯原文作統和據傳德源以乾亨初卒乾亨爲景宗年號統和爲聖宗年號卒在

先仕反在後考德源父子兄弟俱早仕景宗即其弟德讓德
威德疑遷擢俱始於保甯德源爲長兄不應始仕於聖宗朝
其爲保甯之訛無疑謹改正官崇儀興國二軍節度使加檢校太師以賄

名德讓貽書諫之終不悛以故論者少之後加同政事門下

平章事遙攝保甯軍節度使乾亨初卒

遼史

冀州

王白冀州人明天文善卜筮晉司天少監太宗入汴得之應

歷十九年王子札穆

原作只沒

以事下獄其母求卜白曰此人當

王未能殺也毋過憂景宗卽位釋其罪封甯王果如其言

遼史

宋太祖收晉水浸河東之軍晉危使殿直程再榮入遼求援

叩於白曰敝邑危蹙不保白曰晉必無患南兵五月十七日

當回晉次日必大濟再榮因問他日安危之數白曰後十年

晉破破卽掃地矣是年宋師果不克晉迨後十年當太平興

國四年方平晉壘

續湘山野錄

凡決禍福多此類保甯中歷彰武

興國二軍節度使撰百中歌行於世

遼史

年八十卒

續湘山野錄

金

順天府

韓昉字公美燕京人五歲喪父哭泣能盡哀遼天慶二年中

進士第一入金累官乾文間待制知制誥充高麗國信使自

天會四年高麗稱藩不進誓表累使皆不得要領昉至其國

中徵讀書知古今者商確辭旨涉旬始置對謂昉曰小國事

遼宋二百年無誓表未嘗失藩臣禮今事上國當與事遼宋

同禮昉曰貴國必欲用古禮唐虞三代天子巡狩羣后四朝

今天子方巡狩

謹案原傳作西狩續通志云金史地理志高麗在上京東南二千餘里金主東巡高麗始

在朝會之列西字疑誤謹改

貴國當從朝會其人無以對乃進誓表如約

而還帝聞大悅

謹案原傳作宗幹大悅今據宏簡錄改

非卿誰能辦此明年加

昭文館直學士兼堂後官再加諫議大夫遷翰林侍講學士

改禮部尙書遷翰林學士兼太常卿修國史尙書如故朝廷

議禮制度因革咸出其手除濟南尹拜參知政事皇統四年

表乞致仕不許六年再表乞致仕除汴京留守封鄆國公俄

以儀同三司致仕天德初加開府儀同三司卒年六十八昉

性仁厚待物甚寬有家奴誣告昉以馬資送叛人出境考之

無狀有司以奴還昉昉待之如初善屬文最長於詔冊作太

祖睿德神功碑當世稱之高麗使者至必問昉安否

金子汝史

嘉皇統二年進士累遷真定路轉運使坐公事遷清州防禦

使召爲翰林侍讀學士卒

中州集

程案字公弼燕之析津人祖冀仕遼爲廣德軍節度使冀凡

六男父子皆擢科第士族號其家爲程一舉冀次子四穆遼
崇義軍節度使宋四穆季子也幼如成人及冠篤學中進士
甲科累遷殿中丞天輔七年太祖入燕授尙書都官員外郎
錦州安昌令累加起居郎爲史館修撰以從軍有勞加少府
少監熙宗時歷翰林待制兼右諫議大夫案上疏言事其略
曰殿前點檢司古殿巖環衛之任所以肅禁禦尊天子備不
虞也比見陛下校獵凡羽衛從臣無貴賤皆得執弓矢馳逐
而聖駕崎嶇沙磧之地加之林木叢鬱易以迷失竊惟古天
子出入警蹕清道而行以備非常陛下膺祖宗付託之重奈
何獨與數騎出入林麓沙漠之中前無斥候後無羽衛甚非
肅禁禦之意也臣願陛下熟計之後若復獵當預戒有司圖
上獵地具其可否則然後下令清道而行擇衝要稍平之地爲

駐蹕之所簡忠義爪牙之士統以親信腹心之臣警衛左右
俟麋鹿既來然後馳射仍先遣搜閱林藪明立標幟爲出入
之馳道不然恐貽宗廟社稷之憂又曰臣伏讀唐史追尊高
祖以下諡號或加至十八字前宋大中祥符間亦加至十六
字亡遼因之近陛下亦受崇天體道欽明文武聖德十字臣
竊謂人臣以歸美報上爲忠天子以追崇祖考爲孝太祖武
元皇帝受命開基八年之間奄有天下功德茂盛振古無前
止諡武元二字理或未安何以示將來臣願詔有司定議諡
號庶幾上慰祖宗在天之靈使耿光丕烈傳於無窮又曰古
者天子巡狩無非事者或省察風俗或審理冤獄或問民疾
苦以布宣德澤皆巡狩之名也國家肇興誠恐郡國新民逐
末棄本習舊染之汙奢侈詐僞或有不明之獄潛濫之刑或

力役無時四民失業今鑿輅省方將憲古行事臣願天心洞照委之長貳釐正風俗或置匭匣以申冤枉或遣使郡國問民無告皆古巡狩之事如此則和氣通天下太平可坐而待也又曰臣聞善醫者不視他人之肥瘠察其脈之病否而已善計天下者不視天下之安危察其紀綱理否而已天下者人也安危者肥瘠也紀綱者脈也脈不病雖瘠不害脈病而肥者危矣是故四肢雖無故不足恃也脈而已矣天下雖無事不足矜也紀綱而已矣尙書省天子喉舌之官紀綱在焉臣願詔尙書省戒勵百官各揚其職以立綱紀如吏部天官以進賢退不肖爲任誠使升黜有科任得其人則綱紀理而民受其賜前代興替未始不由此者虞舜不告而娶二妃帝嚳娶四妃法天之四星周文王一后三夫人嬪御有數選求

淑媛以充後宮帝王之制也然女無美惡入宮見妬陛下欲
廣嗣續不可不知而告戒之又曰臣伏見本朝富有四海禮
樂制度莫不一新宮禁之制尙未嚴密胥吏健卒之輩皆得
出入莫有呵止至淆混而無別雖有闌入之法久尙未行甚
非嚴禁衛明法令之意疏奏帝嘉納之始命有司議上太祖
尊諡皇統八年由翰林侍講學士爲橫海軍節度使移彰德
軍節度使卒年六十二案剛直耿介不諂奉權貴以希苟進
有古君子之風云

金史

任熊祥字子仁八代祖圓後唐宰相圓孫睿隨石晉北遷還
爲燕人熊祥登遼天慶八年進士第爲樞密院令史太祖平
燕以其地畀宋熊祥至汴授武當丞宋法新附官不釐務熊
祥言於郡守楊質請止給半俸養親質喜其廉金人取均房

州熊祥歸朝後爲樞密令史時西京留守高慶裔攝院事無

敢忤其意者熊祥未嘗阿意事之後杜充劉管同知燕京行

省法制未一日有異論熊祥爲折衷之厯深磁州刺史關府

少尹行臺工部郎中同知汴京留守事天德初爲山東東路

轉運使改鎮西軍節度使時詔徐文張宏信討東海縣宏信

逗遛稱疾不進決杖二百熊祥被詔爲會試主文以事不避

難臣之職爲賦題及御試熊祥復以賞罰之令信如四時爲

賦題海陵大喜以爲翰林侍讀學士大定初起爲太子少師

時契丹賊斡罕竊號北鄙用兵未息帝以爲憂熊祥請以恩

信招懷之帝問孰可使者對曰臣雖老憑國威靈尙堪一行

帝曰卿老矣無煩爲此七年復致仕卒熊祥事母以孝聞母

沒時熊祥年已七十三日不食人皆稱之

金史

韓企先燕京人九世祖知古爲遼中書令徙居柳城謹案遼史韓知

古傳作薊州玉田人此言徙唐柳城兩傳互世貴顯乾統間

異謹依雍正舊志編韓企先傳入順天府

企先中進士第回翔不振都統臬定中京擢樞密副都承旨

稍遷轉運使宗翰爲都統經略山西表署西京留守天會六

年同中書門下平章事知樞密院事七年遷尙書左僕射兼

侍中封楚國公十二年爲尙書右丞相召至上京時方議禮

制度損益舊章企先博通經史知前代故事或因或革咸取

折衷企先爲相密謨顯諫彌縫闕漏專以培植獎勵後進爲

己任一時臺省多君子宗翰宗幹雅敬重之世稱賢相焉皇

統元年封濮王六年卒年六十五正隆二年例降封齊國公

大定八年配享太宗廟廷十一年將圖功臣像於衍慶宮帝

以前後漢人宰相無能及企先者詔置功臣畫像中以勸後

人十五年謚簡懿子鐸有傳金史

金史

左企弓字君財薊人讀書通左氏春秋中進士爲來州觀察判官蕭英弼賊昭懷太子窮治黨與多連引企弓辨析其冤免者甚衆自御史知雜事出爲中京副留守按刑遼陽有獄本輕而入之重者已奏待報企弓釋之以聞累遷知三司使事天慶末拜廣陵軍節度使同中書門下平章事知樞密院事金兵已拔上京北樞密院恐忤旨不以時奏遼故事軍政皆關決北樞密院然後奏御企弓以聞遼主曰兵事無乃非卿職耶對曰國勢如此豈敢循例爲自容計因陳守備策拜中書侍郎平章事監修國史時遼主聞金已克中京將西幸避之企弓諫不聽遼主自駕鴛鴦灤亡保陰山秦晉國王耶律

聶呼自立於燕廢遼主爲湘陰王改元德興企弓守司徒封

燕國公德妃攝政加侍中太祖至居庸關蕭妃自古北口遯去都監高陸等送款太祖徑至城下高陸等開門待之太祖入城受降企弓等猶不知太祖駐蹕燕京城南企弓等奉表降太祖俾復舊職企弓守太傅中書令太祖既定燕京從初約以與宋人企弓獻詩略曰君王莫聽捐燕議一寸山河一寸金太祖不聽是時置樞密院於廣甯府企弓等將赴廣甯張覺在平州有異志太祖欲以兵送之企弓等辭曰如此是促之亂也及過平州舍於栗林下張覺使人殺之年七十三諡英烈天會七年贈守太師遣使致奠正隆二年改贈特進濟國公子泌瀛淵泌字長源仕遼官至棣州刺史太祖平燕泌從企弓歸朝旣而東遷至平州企弓爲張覺所害泌復還燕是時以燕與宋宣撫司遣至汴泌以平州仇人所在乃間

道奔還朝廷嘉之擢西上閣門使從宋王宗望南伐破眞定
有功知邢州厯刺澤隰等州貞元初爲濬州防禦使遷陝西
路轉運使封戴國公泌性夷澹好讀莊老年六十一卽請致
仕時人高之卒年七十四淵累官燕副留守中京路都轉運
使厯河北東路中都路都轉運使淵貪鄙三任漕事務以錢
穀自營在中都凡八年不求遷與李通許霖交關賄賂詭納
漕司諸物規取財利世宗卽位淵使其子貽慶任忠傑榜第
三甲進士授從仕郎大定二年改淵沁南軍節度使世宗素
知其爲人戒以毋刻削百姓到懷州未幾坐前爲中都轉運
嘗盜用官材木除名子光慶另有傳

金史

趙元字善長涿州范陽人遼天慶八年登進士第仕至尙書

金部員外郎遼亡郭藥師爲宋守燕以元掌機宜文字金師

取燕藥師降樞密使劉彥宗辟元爲本院令史天會間同知
薊州事有賊殺人橫道官吏圍視莫知所爲路人耕夫聚觀
甚衆元指田中釋耒而來者曰此賊也叱左右縛之遂伏僚
吏問其故元曰偶得於眉睫間耳其後朝廷立磨勘格凡嘗
仕宣和者皆除名籍元在磨勘中齊國廢置行臺省於汴選
元備官屬授行省兵部郎中行臺徙大名再徙邢州宗弼再
取河南元皆攝戶部事賦調兵食取辦天眷三年爲行臺右
司員外郎因有殺人當死者行臺欲宥之元不從反覆數四
勢不可奪乃仰天歎曰如殺人者可宥死者復何辜何欲徼
己福而亂天下法乎行臺竟不能奪改左司員外郎攝吏部
事在行臺凡十年吏事明敏行臺或有事上相府宗弼必問
曾經趙元未也其見重如此爲同簽汴京留守事改同知大

名尹用廉遷河北西路轉運使歷彰德武勝等軍節度使以

老致仕卒於家

金史

劉彥宗字魯開大興宛平人其先六世仕遼相繼爲宰相父
霄至中京留守彥宗擢進士乙科天祚走天德秦晉國王耶
律聶哱自立於燕擢彥宗留守判官蕭妃攝政遷簽書密院
事太祖至居庸關蕭妃自古北口遯去都監高陸送款於太
祖太祖駐蹕城南彥宗與左企弓等奉表太祖一見器遇之
俾復舊職遷左僕射佩金牌使宣慰張覺太祖還上京留宗
翰都統軍事彥宗佐之及張覺敗奔於宋衆推張敦固爲都
統殺使者乘城拒守攻之不下乃以彥宗同中書門下平章
政事知樞密院事加侍中佐宗望軍宗望方圖攻取凡州縣
之事委彥宗裁決天會二年詔彥宗遣使諭中京兩路務勤

稼穡其官民犯在降附前者勿論未幾大舉伐宋彥宗畫十

策詔兼領漢軍都統

謹案大金國志天會三年宗翰宗望分道南侵東路之軍建樞密院於燕山以

劉彥宗主院事西路之軍建樞密院於雲中以時立愛主院事蓋卽此時也師還宗望分將士屯

安肅雄霸廣信之境留棟摩彥宗於燕京節制諸軍明年再

伐宋已圍汴京彥宗謂宗翰宗望曰蕭何入關秋毫無犯惟

收圖籍遼太宗入汴載路車法服石經以歸

謹案廿三史考異云漢魏之石

經在洛陽唐之石經在京兆汴都無石經也汴都石經宋嘉祐所刻在遼入汴以後彥宗所云殊未足信或云石經當是

石鼓皆令則也二帥嘉納之執二帝以歸六年卒年五十三

追封鄆王正隆二年例降封開府儀同三司大定十五年追

封兗國公諡英敏子萼次子箐萼遼末以蔭補閣門祇候天

輔七年授禮賓使累官德州防禦使天德初歷左右宣徽使

拜參知政事進尙書左丞爲沁南軍節度使歷臨洮太原尹

正隆南伐爲漢南道行營兵馬都統制大定初除興中尹封
任國公歷順天定武軍節度使濟南尹萼淫縱無行所至貪
墨狼藉廉使劾之詔遣大理少卿張九思就濟南鞫問旣就
逮不測所以引刀自殺不死詔削官一階罷歸田里卒子仲
詢天德三年賜王彥潛榜及第筭幼以蔭補閭門不就去從
學遼末調兵筭在選中兵敗左右多散亡選筭爲扈從授左
承制遼主西奔蕭妃攝政賜筭進士第授尙書左司員外郎
寄班閭門天輔七年太祖取燕筭從其父兄出降遷尙書左
司郎中八年授殿中少監太祖崩宋夏遣使弔慰凡館見禮
儀皆筭詳定遷衛尉少卿授西上閭門使仍從事元帥府凡
約束廢置及四方號令皆從筭經畫天會二年遷太常少卿
東上閭門使從宗翰伐宋圍太原衛尉卿權簽宣徽院事四

年授左諫議大夫秋復南征權中書省樞密院事父憂明年起復直樞密院事加給事中七年爲禮部侍郎十年改彰信軍節度使權簽中書省樞密院事天眷二年改左宣徽使熙宗幸燕法駕儀仗箬討論者爲多皇統元年充江南封冊使假中書侍郎至臨安宋人榜其居曰行宮箬曰未受命而曰行宮非也請去榜而後行禮宋服其有識乃厚賄之奉金珠三十餘萬箬不之顧六年爲行臺尙書右丞相兼判左宣徽使事留京師或請釐革河南官吏之濫雜者箬曰廢齊用兵江表求一切近效其所居人不必皆以章程故有不由科目而爲大吏不試弓馬而握兵柄者今撫定未久姑收人心奈何爲是紛更也遂仍其舊七年帥府議於館陶築三城有警卽令北軍人居之箬曰今天下一家孰爲南北設或有變軍

人入城獨能安耶當嚴武備以察姦無示彼此之間也初以河外三州賜夏人或言秦之在夏者數千人皆願來歸諸將請約之箐曰三小州不足爲輕重恐失朝廷大信且秦人之在蜀者倍多於此何獨捨彼而取此乎並從箐議陝西邊帥請完沿邊城郭以備南寇箐曰我利車騎而不利城守今城之則勞民而結怨况盟已定豈可妄動遂罷之九年拜司空尋拜平章政事封吳國公行臺右丞相如故天德元年封滕王二年拜尙書右丞相兼中書令進封鄭王未幾以疾求解政務授燕京留守進封曹王居數月乞致仕箐自爲宣徽使以能得悍后意致位宰相海陵卽位意頗鄙之及箐求致仕詔略曰不爲暗於臨事不爲諂於事君未許告歸姑從解職箐慚懼而死年五十八子仲誨有傳

康公弼字伯迪其先應州人家於燕之宛平第進士除著作
郎武州軍事判官辟樞府令史出爲甯遠令縣中隕霜殺禾
稼漕司督賦急繫之獄公弼上書朝廷釋之因免縣中租賦
縣人爲立生祠監平州錢帛庫調役糧於川州大盜侯概陷
川州使護送公弼出境曰良吏也權乾州節度使卒諡忠肅
天會七年贈侍中正隆二年改贈特進道國公

金史

馬諷字良弼大興溇陰人金初以燕與宋諷遊學汴梁登宣
和六年進士第宗翰克汴京諷歸朝復登進士第調蔚州廣
靈丞遷雄縣歸信令境有河曰八尺口每秋潦漲溢害民田
諷視地高下疏決之其患遂息召爲尙書省令史除獻州刺
史天德初改甯州民有告謀不軌者株連數十百人諷察其
無狀乃究問告者伏其誣衆懽呼感泣再遷南京副留守入

爲大理少卿是時高禎爲御史大夫責貴重繩治無所避權
貴憚其威嚴乃以諷爲中丞欲中傷之諷不與禎絲髮相假
借禎畏其害已訴於海陵海陵每慰安之諷改大理卿歲餘
除爲順天軍節度使大定二年復爲大理卿遷刑部尙書改
忠順軍節度使致仕卒

金史

張斛字德容漁陽人仕宋爲武陵守金初口口北歸官祕書
省著作郎有南游北歸等詩行世文筆字畫皆有前輩風調

中州集

翟永固字仲堅中都良鄉人太祖以燕歸宋宋人以經義兼
策取士永固中第一授開德府儀曹參軍金破宋永固北歸
中天會六年詞賦科授懷安丞遷望雲令補樞密院令史辟
左副元帥宗翰府掾永固家貧求外補宗翰愛其能不許以

錢三千貫周之薦於朝攝左司郎中除定武軍節度副使歷
同知清州防禦使累遷工部員外郎母憂去官起復禮部郎
中遷翰林直學士海陵篡位宋國賀正旦使至廣甯以侍衛
親軍都指揮使完顏思恭爲報諭宋使永固爲副且令永固
伺察動靜使遷改禮部侍郎久之分護燕京宮室役事永固
請寫無逸圖於殿壁不納俄遷太常卿考試貞元元年進士
出尊祖配天賦題海陵以爲猜度己意杖二十頃之遷禮部
尙書賜笏頭毬文金帶改永定軍節度使正隆二年例降二
品以上官爵永固階光祿大夫不降以寵異之遷翰林學士
承旨與直學士韓汝嘉俱召至內殿問以將親伐宋事永固
對曰宋人事本朝無釁隙伐之無名縱使可伐亦無煩親在
遣將帥可也由是大忤海陵意因請致仕歸卧於家大定二

年起拜尙書左丞請依舊制廉察官吏革正隆守令之汙從

之明年出爲眞定尹五年懇乞致仕許之六年卒

金史

高士談字子文燕人宣和末仕忻州戶曹仕金爲翰林直學

士皇統初預宇文之禍著有蒙城集子公振亦有詩名

大金國志

李伯淵寶坻人本安平都尉司千戶美姿容深沉有謀憤崔

立不道欲仗義殺之天興三年六月甲午與李琦等定計傳

近境有宋軍伯淵等陽與立謀備禦之策翼日晚伯淵等燒

外封邱門以警動立是夜立殊不安一夕百卧起比明伯淵

等約立視火立從苑秀折希顏數騎往諭京城民十五以上

七十以下男子皆詣大廟街點集旣還行及梳行街伯淵欲

送立還二王府立辭數四伯淵固欲送立不疑倉卒中就馬

上抱立立顧曰汝欲殺我耶伯淵曰殺汝何傷卽出七首橫

刺之洞而中其手之抱處再刺之墜馬死伏兵起合殺苑秀折希顏後至爲軍中所斫走梁門追斬之伯淵繫立屍馬尾至內前號於衆曰立殺害劫奪烝淫暴虐大逆不道古今無有當殺之否萬口應曰寸斬之未稱也乃梟立首望承天門

祭哀宗軍民皆勵或剖其心生噉之見金史崔立傳翼日奔宋襄陽

潰死難據郝經詩增謹案元曹居一撰李伯淵奇節傳云初京城荒殘恩僧徙居皇建院一日暮夜侍者入告

日有戎衣腰金符者醉墮馬門外從者不能起或致寇吾得無累乎令視之識者謂總帥李伯淵也使扶詣方丈憇俟其

醒語之曰當此大喪亂公何嗜酒如是生爲男子與其徒沉溺於亂世曷若立身後不朽之榮名哉伯淵矍然黎明召同

志黃憫相與拜恩而師焉居無何往請恩屏人而言曰崔立狂豎乘國家傾危天子播越輒敢叛亂乃爾吾欲誅之久矣

師謂男子身後不朽之榮名其在是耶恩拒不可曰爾何遠出此速禍語伯淵泣且誓恩察之誠乃握手歎曰吾情亦不

能匿矣吾自相州遭遇宣宗荷國厚恩二十餘年矣圖報萬一此何愛焉但患力微寡援事不濟耳今幸聞公舉非常之

事樹萬世之名使老僧朝見而夕死無憾合掌加額曰惟以必中爲公賀未幾適驛使有相困者伯淵因之入見崔立給

日丞相避擾不出則今日之事有大不安者立欲出心動乘
墮輒欲回伯淵厲聲曰我輩兵家子倘墮馬何怪焉疆其行
至故英郎之西通衢中忽有人突出抗言屈事且呼且前伍
伯淵不止直請立馬首挽其鞚時伯淵駢右即拔刃抱而刺
之洞貫至自中其左掌與之俱墮馬崔立尙能語曰反爲賊
奴所先隨斃伯淵暨黃惘等五人實共其事乃大呼曰所
者此逆賊耳他人無與焉遂磔崔立之尸祭於承天門下一
軍哀號聲動天地翼日奔宋恩在其行時甲午秋七月也元
史殊略謹誌於後

孫卽康字安伯析津人八代祖延應仕遼至涿州刺史曾祖
克構遼檢校太傅啟聖軍節度使卽康克構曾孫中大定十

年進士第爲尙書省令史章宗卽位累遷戶部員外郎金史三

年六月卽康等同鹽司官議軍民犯私鹽三百里內者鹽司

按罪遠者付提點所皆徵護之賞於販造者明安穆昆部人

煎販入盜者所管官論贖三犯杖之能捕獲則免罪濱州渤

海縣永和鎮去州遠恐藏盜及私鹽可改爲永豐鎮與曹子

山村各剗設巡檢山東寶坻滄鹽司判官乞陞爲從七品用

進士上命明安穆昆杖者再議餘皆從之

見金史食貨志

除耀州刺

史入爲吏部左司郎中帝謂宰臣曰孫卽康向爲省掾言語

拙訥今才力大進非向時比也遷御史中丞與同簽大睦親

府事罪鞫治鎬王永中父子皆賜死時論寃之頃之遷泰甯

軍節度使改知延安府事承安五年以司空襄薦復召爲御

史中丞泰和三年除參知政事明年進尙書右丞六年宋渝

盟有端大臣猶以爲小盜竊發不足恤卽康與左丞布薩端

參政通吉思忠謂必當用兵帝以爲然帝問卽康參知政事

賈鉉曰太宗廟諱同音字有讀作成字者旣非同音便不當

缺點畫睿宗廟諱改作崇字其下郤有本字全體若將示字

依蘭亭帖寫作未字充字合缺點畫如統旁之充似不合缺

卽康奏曰唐太宗諱世民偏旁犯如葉字作業字泯字作泯字乃擬熙宗廟諱從面從且睿宗廟諱上字從未下字從世世宗廟諱從系顯宗廟諱如正犯字形止書斜畫沈字鈇字各從口兌悅之類各從本傳從之自此不勝曲避矣進左丞宋人請和進官一階章宗崩衛紹王卽位卽康進拜平章政事封崇國公大安三年致仕是歲卒

金史

宋珪本名乞奴燕人爲內侍殿頭宣宗嘗以元夕欲觀燈戲命乞奴監作微聞諍語云社稷棄之中都南京作燈戲有何看耶杖二十旣而悔之有旨宣諭哀宗放鶴後苑鶴逸去敕近侍追訪市中一農民臂此鷄百方索之酬以值僅乃得事聞哀宗欲送有司乞奴諫曰貴畜賤人豈可宣示四方又被杖尋亦悔賜物慰遣之及富察官努之變哀宗恨爲所制欲

誅未能官努往亳州珪與奉御烏克遜愛實納喇奇塔特護
衛鈕祜祿溫綽范察遜王善爾等謀誅之官努自亳還入見
珪等卽從旁殺之蔡城破哀宗自縊於幽蘭軒珪從死有潘
守恆者亦內侍素稱知書南遷後規益甚多及哀宗走歸德
道次民家守恆進櫛曰願陛下還宮之日無忘此草廬中更
加儉素以濟大業帝聞其言悽惋咨嗟久之

金史

保定府

時立愛字昌壽涿州新城人遼太康九年中進士第調泰州
幕官丁父憂服除調同知春州事未逾年遷雲內縣令再除
文德令樞密院選爲吏房副都承旨轉都承旨累遷御史中
丞剛正敢言忤權貴除燕京副留守母憂起復舊職遷總兵
軍節度使兼漢軍都統金太祖已定燕京韓詢持詔招諭平

州立愛使人來送款詔曰朕親巡西土號令所加城邑皆下
爰嘉忠款特示優恩大小官員皆充舊職諸囚配隸並從釋
免時遼帝尙在天德平州雖降民心未固奚王和勒博軍所
在保聚薊州已降復叛民間流言立愛雖開諭而不肯信乃
上表乞下明詔遣官分行郡邑宣諭德意他日兵臨於宋討
逆撫順兵不勞而天下定矣上覽表嘉之詔答曰卿始率吏
民歸附復條利害悉合朕意山西部族緣遼主未獲恐陰相
連結故遷處於嶺東西京人民旣無異望皆安堵如故或有
將卒貪悍冒犯紀律輒掠降人者已諭諸部及軍帥約束兵
士秋毫無犯必刑無赦今遣沃赫阿里等爲卿副貳以撫斯
民其告諭所部使知朕意其後以平州爲南京用張覺爲留
守時立愛遂去平州歸鄉里太祖以燕薊與宋新城入於宋

宋累召立愛立愛見宋政日壞不肯起戒其宗族不得求仕及宗望再取燕山立愛詣幕府上謁拜同中書門下平章事任其子姪數人立愛從宗望軍數年謀畫居多封陳國公表求解機務不從九年爲侍中知樞密院事久之加中書令天會十五年致仕加開府儀同三司封鄭國公卒於家年八十

二賻贈錢布緡帛有差

金史

李成字伯友雄州歸信人勇力絕倫能挽弓三百斤宋宣和初試弓手挽強異等累官淮南招捉使聚衆爲盜鈔掠江南宋遣兵破之成遂降劉預累除知開德府從大軍代宋齊廢再除安武軍節度使成在降附諸將中最勇鷙號令甚嚴衆莫敢犯臨陣身先諸將士未食不先食有病者親視之不持雨具雖沾濕自如也有告成反者宗弼察其誣使成自治成

杖而釋之其不較如此以此士樂爲用所至克捷宗弼再取
河南宋李興據河南府成引軍入孟津興率衆薄城鼓譟請
戰成不應日下昃興士卒倦且飢成開門急擊大破之興走
漢南成遂取洛陽嵩汝河南平宗弼奏成爲河南尹都管押
本路兵馬嘗取官羨粟充公費坐奪兩官解職正隆間起爲
眞定尹封郡王例封齊國公卒年六十九

金史 謹案宋史
建炎二年河北京

東捉殺使李成叛四年請降於江州以爲四川鎮撫使已而
復叛張俊累敗之遁歸劉豫紹興元年以成在順昌恐復爲
亂諭淮南蔡州將士募人擒
斬之與本傳異謹識於此

承德府

盧彥倫臨潢人遼天慶初蕭貞一留守上京置爲吏以材幹
稱是時臨潢之境多盜而城中兵無統屬者府以彥倫薦於
朝卽授殿直勾當兵馬公事遼兵敗於珠赫店還至臨潢散

居民家令給養之而軍士縱恣侵擾無所不至百姓殊厭苦之留守耶律徹格爾不能禁戢乃召軍民諭之曰契丹漢人久爲一家今邊防有警國用不足致使兵士久溷父老間有侵擾亦當相容衆皆無敢言者彥倫獨曰兵興以來民間財力困竭今復使之養士以國家多故義不敢辭而此輩敢爲強暴人不能堪且蕃漢之民皆赤子也奪此與彼謂何金初取臨潢軍中有辛額特埒者舊爲臨潢驛吏與彥倫善使彼招諭彥倫殺之遼授彥倫團練使勾當留守司公事天輔四年彥倫從留守托卜嘉出降授夏州觀察使權發遣上京留守事師還托卜嘉以城叛彥倫率所部逐托卜嘉盡殺城中契丹遣使來報未幾遼將耶律瑪格以兵取臨潢彥倫拒守者七月會援兵至敵解圍去因赴闕天會二年知新城事城

邑初建彥倫爲經畫民居公宇皆有法政靜江軍節度留守
後知咸州煙火事遷靜江軍節度使天眷初行少府監兼都
水使者充提點京城大內所改利涉軍節度尋復爲提點大
內所彥倫性機巧能迎合悼后意由是頗見寵用歲餘遷侍
衛親軍馬步軍都指揮使爲宋國歲元使改禮部尙書加特
進封郇國公天德二年出爲大名尹明年詔彥倫營造燕京
宮室以疾卒年六十九子璣另有傳

金史

田灝字默之興中州人遼天慶八年進士歷官金部員外郎
權歸德節度使金太祖定燕灝舉四州叛圖歸朝加都官郎
中權節度使事四遷知眞定府事招降齊博游貴等賊衆五
千餘人已而貴復叛去灝遣齊博僞叛從貴伺閒殺之降其
衆賊壘悉平三遷行臺左丞彰德軍節度使時新定力役灝

獨籍之半而上之故相之繇賦比他州獨輕徙同知河北東
路都總管改同簽燕京留守司事民遮留不得出易服夜去
改河東南路轉運使尋改絳陽軍節度使居三年以疾請謝
事經解印歸數奏不允移鎮振武軍入爲刑部尙書居三月
請老卒於家金史

毛子廉本名巴克實臨潢長泰人材勇善射遼季盜起募勇
士子廉應募遼主召見賜甲仗率百人會所在官兵捕盜以

功授東頭供奉官賜良馬金天輔四年遣穆昆辛額特埒伊

喇庫色勒原作窟斜招諭臨潢子廉率戶二千六百來歸謹案太祖本紀

天輔六年漢人毛巴克實來降與傳異令就領其衆佩銀牌招未降軍盧彥倫

怒子廉先降殺子廉妻及二子使騎兵二千伺取子廉子廉

與庫色勒經險阻中騎兵圍之兩騎突出直犯子廉子廉引

弓斃其一人其一人挺槍來戰復生擒之餘衆潰去天會三年除上京副留守久之兼鹽鐵事天眷中除燕京魏院都監遼王宗幹問宰相曰子廉有功何爲下遷宰相以例對宗幹曰盧彥倫何不除此職子廉之功十倍彥倫在臨潢十餘年吏民畏愛如一日誰能及此是時盧彥倫已以少府監除節度使故宗幹引以爲比除甯武軍節度使海陵弒熙宗子廉聞之歎曰曾不念國定策之功耶乃致仕大定二年卒

金史

承平府

孟浩字浩然灤州人遼末年登進士第金天會三年爲樞密院令史除平州觀察判官天眷初選入元帥府備任使承制除歸德少尹充行臺吏禮部郎中入爲戶部員外郎郎中韓企先爲相拔擢一時賢能皆置機要浩與田穀皆在尙書省

蔡松年等構成殺死罪浩等三十四人皆徙海上天下寃之
大定二年召爲侍御史尋復爲右司員外郎浩篤實遇事輒
言無所隱帝嘉其忠有疾求外補除邢州刺史致仕歸七年
起爲御史中丞再閱月拜參知政事力辭不允世宗敕有司
於東宮涼樓前增建殿位浩諫曰皇太子義兼臣子若所居
與至尊宮室相侔恐制度未宜宜示以儉德帝曰善遂罷其
役皇太子生日帝宴羣臣於東宮顧謂羣臣曰參政孟浩公
正敢言自中丞爲執政卿等能如是朕亦不次用之又嘗謂
宰臣曰宋前廢帝呼其叔湘東王爲豬王食之以牢納之泥
中以爲戲笑書於史策所以勸善而懲惡也海陵以近習掌
記注記注不明當時行事實錄不載衆人共知之者求訪書
之浩對曰良史直筆君舉必書帝王不自觀史記注之臣乃

得盡其直筆浩復奏曰歷古以來不明賞罰而能治者未之聞也國家賞善罰惡蓋亦多矣而天下莫能知乞自今凡賞功罰罪皆具事狀頒告之使君子知勸以遷善小人知懼以自警從之進尚書右丞兼太子少傅罷爲真定尹十三年卒

金史

齊陶馬城人遼壽昌間監鎮酒務善幹辦金天會中授明威將軍階三級力崇節儉孝友慈惠動以禮法律身鄉閭翕然稱之長子執中官修武校尉仲允中忠顯校尉俱恭謹世其行

樂亭縣志

張介字介甫平州人正大元年經義進士第一爲國用安參議帝將遷蔡用安表請哀宗幸山東帝以其言示宰臣宰臣奏用安反覆本無匡輔志此必參議張介等爲之業已遷蔡

議遂寢盧龍縣志

河間府

劉完素字守真河間人

謹案雍正舊志作遼人

嘗遇異人陳先生飲以

酒大醉及寤洞達醫術若有授之者乃撰運氣要旨論精要

宣明論慮庸醫或出妄說又著素問元機原病式特舉二百

八十八字

一統志作二百八十四字誤

注二萬餘言

案河間縣志趙秉文嘗為完素敘所解素

問謂思理精詣洞究微妙然好用涼劑以降心火益腎水為

主自號通元處士

金史

朝廷三聘不起賜號高尚先生

河間府志

正定府

蔡松年字伯堅父靖宋宣和末守燕山軍敗靖辟松年為令

史累除真定府判官遂為真定人真定西山羣盜初平辨居

民為賊汙者千餘家得不坐宗弼伐宋松年總管軍中六部

事宋稱臣宗弼入相薦爲刑部員外郎皇統時宗弼當國田
穀性剛正好評論人物爲宰相韓企先所重松年與許霖等
欲與穀相結穀拒之松年等搆以黨事誅穀海陵前在宗弼
軍與松年厚善及卽位擢吏部侍郎俄遷戶部尙書海陵遷
中都徙摧貨務復鈔引法皆松年啟之海陵謀伐宋以松年
家世仕宋累擢顯位以聳南人觀聽改吏部尙書尋拜參知
政事遷尙書右丞未幾爲左丞封郕國公正隆二年進拜右
丞相加儀同三司封衛國公四年卒年五十三海陵悼惜之
加封吳國公諡文簡松年事繼母以孝聞喜周恤親黨性豪
侈文詞清麗尤工樂府與吳激齊名時號吳蔡體有集行世

子珪有傳

金史

廣平府

張煒字子明洺州永年人本名燝避章宗嫌名改焉大定二十五年進士調葭州軍事判官再遷中都左警巡使煒喜言功利寡廉潔交通部民間元暈縉紳薄之累官戶部員外郎承安五年天色久陰晦平章政事張萬公奏此由君子小人邪正不分所致君子宜在內小人宜在外章宗問孰爲小人萬公對曰戶部員外郎張煒文繡署丞田櫟都水監丞張嘉貞雖有幹才無德而稱好奔走以取勢利大抵論人當先德後才詔三人皆與外除煒出爲同知鎮西軍節度使事轉同知西京轉運使事是時大築界牆被行戶工部牒主役事毋憂起復桓州刺史奏請以鹽易米所言利害甚多尋充宣差西北路軍儲自言斂不及民可以足用大抵募商賈縱其販易不問所從來姦人往往投牒妄指產業疏鄰保姓名煒信

之多與之錢已而亡去卽逮繫鄰保使之代償一路疲敝以故舊羶剝縉絮皮革折給軍士皆棄於道而去歲餘改戶部郎中遷翰林直學士俱兼規措職事左丞相崇浩奏張煒長於恢辦比戶部給錢三十萬已增息十四萬矣請給錢通百萬令從長恢辦乞不隸省部委臣專一提控有應奏者許煒專達歲差幹事官計本息具奏帝從其請泰和六年

謹案續通志作

泰和八年

伐宋煒進銀五千兩詔曰人之短汝朕皆知之惟能興

利斯爲汝功自西北路召還勾計諸道倉庫除簽三司事帝問誰可代卿規措者煒舉中都轉運戶籍判官王謙謙至西北路盡發煒前後散失錢物以鉅萬計對獄者積年大安三年起爲同簽三司事會河東兵敗軍士猶云張宣差刻我欲倒戈殺之累遷戶部侍郎貞祐初遷河北西路按察轉運使

貞祐二年春中都乏糧詔同知都轉運使事邊源以兵萬人護送通州積粟軍敗死焉平章政事高琪舉煒代源行六部事以勞進官一階改河北東路轉運使宣宗遷汴佐尙書右丞胥鼎前路排頓及修南京宮闕無何坐事降孟州防禦使三年遷安國軍節度使致仕宣宗初以煒有才既察其無實遂不復用貞祐四年卒

金史

李慶嗣洺州人少舉進士不第棄而學醫讀素問諸書洞曉其義天德間歲大疫慶嗣攜藥與米分遺貧民全活甚衆年八十無疾而終所著有傷寒纂要及傷寒論針經等書

明一統志

大名府

蘇椿大名人初守大名城潰降元正大二年自大名奔汴

金史

瓜爾佳實倫傳以元帥守許州時元兵南下至許節度使石倫遣提

金史通志 卷二百九十四
三
挖高珪往斥堠珪降元引大兵至城下使韓壽孫持檄招降

倫椿斬之既而城陷椿被擒

明一統志

問以大名南奔之事椿曰

我本金朝人無力故降我歸國得爲大官何謂反耶大將怒

其不屈殺之

金史瓜爾佳實倫傳

宣化府

李師夔字賢佐奉聖州永興人少倜儻有大志以廕入仕爲本州勸監金天輔六年太祖襲遼主於鴛鴦灤郡守委城遁去衆無所屬請師夔主郡事師夔許之乃搜卒治兵都古嚕訥引兵至師夔與其故人沈璋密謀出降卽率親信十數輩出城見伊都與之約曰今已服從願無以兵入城及俘掠境內伊都許諾詔授武定軍節度使沈璋佐之俾招未附者許便宜從事明年加左監門衛大將軍劇賊張勝以萬人逼城

師夔度衆寡不敵僞與之和曰致饋給勝信之師夔乘其不備使人刺殺以其首徇曰汝輩皆良民脅從至此今元惡已誅可棄兵歸復其所賊衆大驚皆散去別賊焦望天尹智穆率兵數千來寇師夔設伏歸路使人反閒之智穆果疑望天先引去智穆勢孤亦還遇伏而敗遂執斬之是後賊衆不敢入境以勞遷靜江軍節度留後累遷武平軍節度使改東京路轉運使徙陝西東路轉運使致仕封任國公卒年八十五

金史

遵化州

李瞻薊州玉田人遼天慶三年進士爲平州望雲令張覺據平州叛以瞻爲從事宗望復平州覺亡去城中復叛瞻踰城出降其子爲賊所害宗望嘉之承制以爲興平府判官天會

三年遷大理少卿從宗望南伐爲漢軍糧料使四年金兵圍汴宋人請割河北三鎮瞻與禮部侍郎李天翼安撫河北東西兩路略定懷濬衛等州衛湯陰等縣七年知甯州累遷德州防禦使爲政寬平民懷其惠詣京師請留者數千百人貞元三年遷濟州路轉運使改忠順軍節度使正隆末盜賊竊起瞻增築城壘爲備蔚人賴之以安大定初卒於官

金史

易州

張通古字樂之易州易縣人讀書過目不忘該綜經史善屬文遼天慶二年進士第補樞密院令史父憂起復懇辭不獲因遞去屏居興平太祖定燕京割以與宋宋以通古有素望召之通古辭謝隱居易州太甯山下宗望復燕京侍中劉彥宗與通古素善薦其才召爲樞密院主奏改兵刑部房承旨

天會四年初建尙書省除工部侍郎兼六部事高慶裔設磨

勘法仕宦者多奪官通古亦免去遼王宗幹素知通古名惜

其才爲論理之除中京副留守

謹案續通志云熙宗紀交聘表天眷元年八月以河南地

與宋遣左司郎中張通古等使江南此處與紀表稍異

爲詔諭江南使宋主欲南面使

通古北面通古口大國之卿當小國之君天子以河南陝西

賜之宋宋約奉表稱臣使者不可以北面遂索馬欲北歸宋

主遽命設東西位使者東面宋主西面受詔拜起皆如儀使

還聞宋已置戍河南謂送伴韓肖胄曰天子裂壤地以益南

國當思圖報大恩今輒置守戍自取嫌疑若興師問罪將何

以爲辭肖胄馳白宋主遽命罷戍通古至上京具以白宗幹

且曰及其部置未定當議收復宗幹喜曰是吾志也卽除參

知行臺尙書省事未幾詔宗弼復取河南通古請先行至汴

諭之比至汴宋人已去或謂通古曰宋人詐退將自許宥來
襲我通古曰南人宣言來者正所以走耳使人覘之果潰去
宗弼撫髀笑曰誰謂書生不能曉兵事哉海陵欲除胙王常
勝會汴卒孫進詐稱皇弟謀作亂因指名胙王以誣搆之遣
護衛塔斯就汴京鞠治行臺欲導孫進引胙王通古極力辯
正及塔斯奏狀海陵譖塔斯故出遂殺胙王行臺諸人懼誅
通古曰以正獲罪死賢於生海陵旣殺胙王不復緣害他人
由是坐止塔斯行臺不坐天德初遷行臺左丞進拜平章政
事封譚王改封鄆王以疾求解機務不許拜司徒封藩王海
陵御下嚴厲收威柄親王大臣未嘗少假以顏色惟見通古
必以禮貌正隆元年以司徒致仕進封曹王是年卒年六十
九通古天資樂易不爲表暴雖居宰相自奉如寒素子沈天

德三年賜楊建中榜及第

金史

張元素字潔古易州人八歲試童子舉二十七試經義進士
犯廟諱下第乃去學醫夜夢有人用大斧長鑿鑿心開竅納
書數卷於中自是洞徹其術河間劉完素病傷寒八日頭痛
脈緊嘔逆不食不知所爲元素往候完素面壁不顧旣爲診
脈謂曰脈病云云曰然初服某藥用某味乎曰然元素曰子
誤矣某味性寒下降走太陰陽亡汗不能出今當服某味則
效完素大服如其言遂愈自此顯名元素治病不用古方其
說曰運氣不齊古今異軌古方新病不相能也自爲家法云

金史